



杜詩分類卷之四

七言古

雜賦類

引水

夔俗無井皆以竹引山泉而食蟠曲山腹  
間有至於數百丈不能止者

月峽瞿塘雲作頂亂石崢嶸俗無井雲安沽水奴僕  
悲魚復移居心力省白帝城西萬竹蟠接筒引水喉  
不乾人生畱滯生理難斗水何直百憂寬

曲江三章章五句

曲江蕭條秋氣高，菱荷枯折隨風濤。遊子空嗟垂二  
毛，白石素沙亦相蕩。哀鴻獨叫求其曹，  
卽事非今亦非古。長歌激越稍林莽，比屋豪華固難  
數。吾人甘作心似灰，弟姪何傷淚如雨。  
自斷此生休問天，杜曲幸有桑麻田。故將移住南山  
邊，短衣匹馬隨李廣。看射猛虎終殘年。

可嘆

王季友豐城人家貧賣履爲生其妻惡欲  
棄之公因賦此

天上浮雲如白衣，斯須改變如蒼狗。古往今來共一

時，人生萬事無不有。近者抉眼去其夫，河東女兒身  
姓柳。丈夫正色動引經，豐城客子王季友。羣書萬卷  
常暗誦，孝經一通看。在手貧窮老瘦家，賣履好事就  
之爲。攜酒豫章太守高，帝孫引爲賓客敬頗久。聞道  
三年未曾語，小心恐懼閉其口。太守得之更不疑，人  
生反覆看已醜。明月無瑕豈容易，紫氣鬱鬱衝牛斗。  
時危可仗真豪俊，二人得置君側否。太守頃者領山  
南，邦人思之比父母。王生早曾拜顏色，高山之外皆  
培塿。用爲羲和天爲成，用平水土地爲厚。王也論道  
阻江湖，李也疑丞曠。前後死爲星辰終不滅，致君堯

舜焉肯朽吾輩碌碌飽飯行風后力牧長迴首

歌行

紀行類

彭衙行

憶昔避賊初北走經險艱夜深彭衙道月照白水山  
盡室久徒步逢人多厚顏參差谷鳥吟不見遊子還  
癡女饑咬我啼畏猛虎聞懷中掩其口反側聲悲噴  
小兒強解事故索苦李餐一旬半雷雨泥濘相攀牽  
既無禦雨備徑滑衣又寒有時經契濶竟日數里間  
野果充餓糧卑枝作屋椽早行石上水暮宿天邊煙

少留同家窪欲出蘆子關故人有孫宰高義薄層雲  
延客已曛黑張燈啓重門煖湯濯我足剪紙招我鬼  
從此出妻孥相視涕闌干衆雛爛熯睡喚起露盤殮  
誓將與夫子永結爲弟昆遂空所坐堂安居奉我歡  
誰肯艱難際豁達露心肝別來歲月週胡羯仍構患  
何當有翅翎飛去墮爾前

徒步歸行

公自賊所竄歸鳳翔肅宗授以拾遺又有  
墨制許往鄜州迎家時李嗣業爲特進守  
邠州公便道往邠以徒步困頓不能前進

遂作此以贈李特進就借乘馬代勞往鄜

州

明公壯年值時危、經濟實藉羣雄姿、國之社稷今若  
是、武定禍亂非公誰、鳳翔千官且飽飯、衣馬不復能  
輕肥、青袍朝士最困者、白頭拾遺徒步歸、人生交契  
無老少、論交何必先同調、妻子山中向天哭、須公櫪  
上追風驃

時事類

兵車行

車麟麟馬蕭蕭、行人弓箭各在腰、耶孃妻子走相送、

塵埃不見咸陽橋、牽衣頓足攔道哭、哭聲直上千雲  
霄、道傍過者問行人、行人但云點行頻、或從十五北  
防河、便至四十西營田、去時里正與裹頭、歸來頭白  
還戍邊、邊庭流血成海水、武皇開邊意未已、君不見  
漢家山東二百州、千村萬落生荆杞、縱有健婦把耕  
犁、木生隴畝無東西、况復秦兵耐苦戰、被驅不異犬  
與雞、長者雖有問、役夫敢伸恨、且如今年冬、未休關  
西卒、縣官急索租、租稅從何出、信知生男惡、及是生  
女好、生女猶得嫁比隣、生男埋沒隨百草、君不見青  
海頭、古來白骨無人收、新鬼煩冤舊鬼哭、天陰雨濕

木言夕夢  
卷之四  
四  
三  
聲啾啾

歲晏行

歲云暮矣多北風，蕭湘洞庭白雲中。漁父天寒網罟凍，莫徭射鴈鳴桑弓。去年米貴闕軍食，今年米賤太傷農。高馬達官厭酒肉，此輩枵柚茅茨空。楚人重魚不重鳥，汝休枉殺南飛鴻。况聞處處鬻男女，割慈忍愛還租庸。往日用錢捉私鑄，今許鉛錫和青銅。刻泥爲之最易得，好惡不合長相蒙。萬國城頭吹盡角，此曲哀怨何時終。

蠶穀行

天下郡國向萬城，無有一城無甲兵。焉得鑄甲作農器，一寸荒田牛得耕。牛盡耕田蠶亦成，不勞烈士淚滂沱。男穀女絲行復歌。

折檻行

嗚呼房魏不復見，秦王學士時難羨。青衿冑子囚泥塗，白馬將軍若雷電。千載少似朱雲人，至今折檻空嶙峋。婁公不語宋公語，尚憶先皇容直臣。

天邊行

公在成都作

天邊老人歸未得，日暮東臨大江哭。隴右河源不種

田胡騎羌兵入巴蜀，洪濤滔天風拔木。前飛禿鶯後  
鴻鵠，九度附書向洛陽。十年骨肉無消息。

大麥行

寶應元年公在成都作

大麥乾枯小麥黃，婦女行泣夫走藏。東至集壁西梁  
洋，問誰腰鑱胡與羌。豈無蜀兵三千人，部領辛苦江  
山長。安得如鳥有羽翅，託身白雲歸故鄉。

苦戰行

上元二年段子璋反陷遂州綿州

苦戰身死馬將軍，白云伏波之子孫。干戈未定矢壯  
士，使我歎恨傷精魂。去年江南討狂賊，臨江把臂難  
再得。別時孤雲今不飛，時獨看雲淚橫臆。

去秋行

去秋涪江木落時，臂搶走馬誰家兒。到今不知白骨  
處，部曲有去皆無歸。遂州城中漢節在，遂州城外巴  
人稀。戰場冤冤每夜哭，空令野營猛士悲。

光祿坂行

山行落日下絕壁，西望千山萬山赤。樹枝有鳥亂鳴  
時，暝色無人獨歸客。馬驚不憂深谷墜，草動只怕長  
弓射。安得更似開元中，道路即今多擁隔。

冬狩行

君不見東川節度兵馬雄，校獵亦似觀成功。夜發猛士三千人，清晨合圍步驟同。禽獸已斃十七八，殺登落日迴蒼穹。幕前生致九青兕，駝駝崑崙垂玄熊。東西南北百里間，髣髴蹴踏寒山空。有鳥名鸚鵡，力不能高飛，逐走蓬肉味，不能登鼎俎。胡爲見羈虞羅中，春蒐冬狩侯得同。使君五馬一馬驄，況今攝行大將權，號令頗有前賢風。飄然時危一老翁，十年厭見旌旗紅。喜君士卒甚整肅，爲我回轡擒西戎。草中狐兔盡何益，天子不在咸陽宮。朝廷雖無幽王禍，得不哀痛塵再蒙。

魏將軍歌

將軍昔著從事衫，鐵馬馳突重兩銜。被堅執銳畧西極，崑崙月窟東嶄巖。君門羽林萬猛士，惡若哮虎子所監。五年起家列霜戟，一日過海收風帆。平生流輩徒蠢蠢，長安少年氣欲盡。魏侯骨聳精爽緊，華嶽峯尖見秋隼。星躔寶校金盤陀，夜騎天駟超天河。攬槍熒惑不敢動，翠旄雲旂相蕩摩。吾爲子起歌都護酒，闌插劍肝膽露鈎陳。蒼蒼風玄武，萬歲千秋奉明主。臨江節士安足數。

戲作花卿歌

花卿名敬定劍南節度崔光遠之牙將時梓州副使段子璋反東川節度李奐敗走光遠率敬定討平之子璋既誅敬定恃功大掠肅宗聞之怒由是不見擢用花卿塚在丹稜東館鎮至今血食其鄉

成都猛將有花卿學語小兒知姓名用如快鶻風火生見賊惟多身始輕綿州副使著柘黃我卿掃除即日平子璋觸體血模糊手提擲還崔大夫李侯重有此節度人道我卿絕世無既稱絕世無天子何不喚

取守京都

古蹟類

石筍行

石筍在成都西門外二株雙蹲一南一北北筍長一丈六尺圍極於九尺六寸南筍長一丈三尺圍極於一丈二尺蓋南筍公孫述時折故長不逮北筍

君不見益州城西門陌上石筍雙高蹲古來相傳是海眼苔蘚食盡波濤痕雨多往往得瑟瑟此事恍惚難明論恐是昔時卿相墓立石爲表今仍存惜哉俗

木言分數 卷之四  
態好蒙蔽亦如小臣媚至尊政化錯迕失大體坐着  
傾危受厚恩嗟爾石笋擅虛名後生未識猶駿奔安  
得壯士擲天外使人不疑見本根

### 石犀行

石犀在成都李太白廟內

君不見秦時蜀太守刻石立作三犀牛自古雖有厭  
勝法天生江水向東流蜀人矜誇一千載泛溢不近  
張儀樓今年灌口損戶口此語亦足爲神羞終藉隄  
防出衆力高擁木石常清秋先王作法皆正道詭怪  
何得衆人謀嗟爾三犀不經濟缺訛只與長川逝但

見元氣常調和自免洪濤恣彫瘵安得壯士提天綱  
再平水土犀奔浩

### 世族類

#### 入奏行

時吐蕃分三道入寇欲取成都爲東府竇  
公以御史出檢校諸州軍儲器械得以便  
宜入奏公作是以贈之

竇侍御驥之子鳳之雛年未三十忠義俱骨鯁絕代  
無烟如一段清水出萬壑置在迎風寒露之玉壺蔗  
漿歸厨金盃凍洗滌煩熱足以寧君軀政用疎通合

典則威聯豪貴。耽文儒。兵革未息。人未蘇。天子亦念西南隅。吐蕃憑陵。氣頗麤。竇氏檢察。應時湏。運糧繩。橋壯士喜。斬木火井窮。猿呼八州。刺史思一戰。三城守邊。却可圖。此行入奏。計未小。密奉聖主恩。應殊繡。衣春當霄漢。立綵服。日向庭闈。趨省郎。京尹必俯拾。江花未落。還成都。肯訪浣花老翁無。爲君酤酒滿眼。酤與奴白飯。馬青藜。

徐卿二子歌

君不見徐卿二子生。絕奇感應吉夢相。追隨孔子釋氏親。抱送並是天上麒麟兒。大兒九齡。色清徹。秋水爲神玉爲骨。小兒五歲。氣食牛。滿堂賓客皆回頭。吾知徐公百不處。積善衮衮生公侯。丈夫生兒有如此。二雛者。名位豈肯卑。微休。

狂歌行贈四兄

與兄行年校一歲。賢者是兄。愚者弟。兄將富貴等浮雲。弟竊功名好權勢。長安秋雨十日泥。我曹鞞馬聽晨雞。公卿朱門未開鑰。我曹已到肩相齊。吾兄睡穩方舒膝。不襪不巾踏曉日。男啼女哭莫我知。身上須繒腹中實。今年思我來嘉州。嘉州酒重花滿樓。樓頭喫酒樓下卧。長歌短詠還相酬。四時八節還拘禮。女

木言分要 卷之四 十一 三百五  
拜弟妻男拜弟。幅巾盤帶不掛身。頭脂足垢何曾洗。  
吾兄吾兄巢許倫。一生喜怒常任真。日斜枕肘寢已  
熟。啾啾唧唧爲何人。

醉歌行

公從姪杜勤落第歸。

陸機二十作文賦。汝更小年能綴文。總角草書又神  
速。世上兒子徒紛紛。驛驕作駒已汗血。鷲鳥舉翮連  
青雲。詞源到流三峽水。筆陣獨掃千人軍。只今年纔  
十六七。射策君門期第一。舊穿楊葉真自知。暫蹶霜  
蹄未爲失。偶然擢秀非難取。會是排風有毛質。汝身  
已見唾成珠。汝伯何由髮如漆。春光淡沲秦東亭。渚  
蒲芽白水荇青。風吹客衣日杲杲。樹攪離思花冥冥。  
酒盡沙頭雙玉瓶。衆賓已醉我獨醒。乃知貧賤別更  
苦。吞聲躑躅涕泣零。

仙釋類

憶昔行

大曆三年出峽後作

憶昔比尋小有洞。洪河怒濤過輕舸。辛勤不見華蓋  
君。艮岑青輝慘么麼。千崖無人萬壑靜。三步回頭五  
步坐。秋山眼冷竟未歸。仙賞心違淚交墮。弟子誰依

白茅屋盧老獨啓青銅鎖巾拂香餘搗藥塵階除灰  
死燒丹火玄圃滄洲莽空濶金節羽衣飄婀娜落日  
初霞閃餘映倏忽東西無不可松風澗水聲合時青  
兕黃熊啼向我徒然咨嗟撫遺跡至今夢想仍猶左  
秘訣隱文湏內教晚歲何功使願果更討衡陽董煉  
師南遊早鼓瀟湘柂

玄都壇歌寄元逸人

玄都壇漢武帝所築在陝西西安府子午  
谷中元逸人隱道士也有神仙術

故人昔隱東蒙峯已佩含景蒼精龍故人今居子午  
谷獨在陰崖結茅屋屋前太古玄都壇青石漠漠常  
風寒子規夜啼山竹裂王母晝下雲旗翻知君此計  
誠長往芝草琅玕日應長鐵鑊高垂不可攀致身福  
地何瀟爽

岳麓山道林二寺行

玉泉之南麓山殊道林林壑爭盤紆寺門高開洞庭  
野殿脚插入赤沙湖五月寒風冷佛骨六時天樂朝  
香爐地靈步步雪山草僧寶人人滄海珠塔劫宮墻  
壯麗敵香厨松道清涼俱蓮花交響共命鳥金榜雙  
廻三足鳥方丈涉海費時節玄圃尋河知有無暮年

且喜經行近，春日兼蒙暄。暖扶飄然斑，白身奚適旁。  
此煙霞茅可誅，桃源人家易制度。橘州田土仍膏腴，  
潭府邑中甚淳古。太守城內不喧呼，昔遭衰世皆晦  
迹。今幸樂國養微軀，依止老宿亦未晚。富貴功名焉  
足圖，又爲野客尋幽慣。細學何顛免興孤，一重一掩  
吾肺腑。山鳥山花吾友于，宋公放逐曾題壁。物色分  
畱與老夫。

時序類

前苦寒行二首

漢時長安雪一丈，牛馬毛寒縮如蝟。楚江巫峽冰入

懷，虎豹哀號又堪記。秦城老翁荆揚客，慣習炎蒸歲  
絺綌。玄冥祝融氣或交，手持白羽未敢釋。

去年白帝雪在山，今年白帝雪在地。凍埋蛟龍南浦  
縮，寒刮肌膚北風利。楚人四時皆麻衣，楚天萬里無  
晶輝。三足之鳥足恐斷，羲和迭送將安歸。

後苦寒行二首

南紀巫廬瘴不絕，太古以來無尺雪。蠻夷長老怨苦  
寒，崑崙天關凍應折。玄猿口噤不能嘯，白鶴翅垂眼  
流血。安得春泥補地裂。

晚來江門失大木，猛風中夜飛白屋。天兵斷斬青海

戎殺氣南行動坤軸。不爾苦寒何太酷。巴東之峽生  
凌澌。彼蒼迴斡人得知。

麗人行

唐明皇時楊國忠與虢國夫人隣居第往  
來無期。或並轡入朝。不施障幘。道路爲之  
掩目。及夫人從車。駕幸華清宮。會於國忠  
第。此麗人行所以作也。

三月三日天氣新。長安水邊多麗人。態濃意遠淑且  
真。肌理細膩骨肉勻。繡羅衣裳燕暮春。感金孔雀銀  
麒麟。頭上何所有。翠爲鬋。葉垂鬢。唇背後何所見。珠

壓腰。被穩稱身就。中雲幕。椒房親賜名。大國號與秦。  
紫駝之峯入翠釜。水晶之盤行素鱗。犀筋厭飫久未  
下。鸞刀縷切空紛綸。黃門飛鞚不動塵。御厨絲絡送  
八珍。簫鼓哀吟感鬼神。賓從雜遝實要津。後來鞍馬  
何逡巡。當軒下馬入錦茵。楊花雪落覆白蘋。青鳥飛  
去銜紅巾。炙手可熱勢絕倫。慎莫近前丞相嗔。

今夕行

今夕何夕歲云徂。更長燭明不可孤。咸陽客舍一事  
無。相與博塞爲歡娛。馮陵大呼呼五白。袒跣不肯成  
臬盧。英雄有時亦如此。邂逅豈卽非良圖。君莫笑劉

毅從來布衣願家無儋石輸百萬

地理類

漢陂行

岑參兄弟皆好奇。攜我遠來遊漢陂。天地黥慘忽異  
色。波濤萬頃堆琉璃。琉璃漫汗泛舟入。事殊興極憂  
思集。鼉作鯨吞不復知。惡風白浪何嗟及。主人錦帆  
相爲開。舟子喜甚無氛埃。鳧鷖散亂棹謳發。絲管啁  
啾空翠來。沈竿續縵深莫測。菱葉荷花淨如拭。宛在  
中流渤澥清。下歸無極終南黑。半陂已南純浸山。影  
動裊窈冲融間。船舷暝戛雲際寺。水面月出藍田關。  
此時驪龍亦吐珠。馮夷擊鼓神龍趨。湘妃漢女出歌  
舞。金支翠旗光有無。咫尺但愁雷雨至。蒼茫不曉神  
靈意。少壯幾時奈老何。向來哀樂何其多。

閬山歌

閬州城東靈山白。閬州城北玉臺碧。松浮欲盡不盡  
雲。江動將崩已崩石。那知根無鬼神會。已覺氣與嵩  
華敵。中原格鬪且未歸。應結茅齋看青壁。

閬水歌

嘉陵江色何所似。石黛碧玉相因依。正憐日破浪花  
出。更復春從沙際歸。巴童蕩槳歌側過。水鷄銜魚來

去飛閬中勝事何腸斷閬州城南天下稀

夔州歌十絕句

中巴之東巴東山江水開闢流其間白帝高爲三峽  
鎮夔州險過百牢關

白帝夔州各異城蜀江楚峽混殊名英雄割據非天  
意霸王并吞在物情

羣雄競起向前朝王者無外見今朝比訝漁陽結怨  
恨元聽舜日舊簫韶

赤甲白鹽俱刺天間閭繚繞接山巔楓林橘樹丹青  
合複道重樓錦繡懸

灩東灩西一萬家江北江南春冬花背飛鶴子遺瓊  
蓋相趁鳧雛入蔣芽

東屯稻畦壹百頃比有澗水通青苗晴浴狎鷗俱處  
處雨隨神女下朝朝

蜀麻吳鹽自古通萬斛之舟行若風長年三老長歌  
裏白晝攤錢高浪中

憶昔咸陽都市合山水之圖張賣時巫峽曾經寶屏  
見楚宮猶對碧峰疑

聞風玄圃與蓬壺中有高堂天下無借問夔州壓何  
處峽門江腹擁城隅

武侯祠堂不可忘，中有柏樹參天長。干戈滿地客愁  
破，雲日如火炎天涼。

樂遊園歌

公自註：賀蘭長史筵醉中作。按西京記：樂  
遊園，漢宣帝所立。唐長安中，太平公主於  
原上置亭遊賞，其地四望寬敞，每上已重  
陽，士女於此，夜襖登高，車馬填塞。朝士詞  
人賦詩，翌日傳於京師。

樂遊古園萃森爽，煙綿碧草萋萋長。公子華筵勢最  
高，秦川對酒平如掌。長生木瓢示真率，更調鞍馬狂  
歡賞。青春波浪芙蓉園，白日雷霆夾城仗。閭闔晴開  
映蕩蕩，曲江翠幕排銀榜。拂水低迴舞袖翻，緣雲清  
切歌聲上。却憶年年人醉時，只今未醉已先悲。數莖  
白髮那拋得，百罰深盃亦不辭。聖朝已知賤士醜，一  
物自荷皇天慈。此身飲罷無歸處，獨立蒼茫自詠詩。

居室類

茅屋為秋風所破歌

八月秋高風怒號，卷我屋上三重茅。茅飛度江洒江  
郊，高者掛罥長林梢，下者飄轉沉塘坳。南村群童欺  
我老無力，忍能對面為盜賊。公然抱茅入竹去，唇焦

才言分數  
卷之四  
三十五  
口燥呼不得歸來倚杖自嘆息俄頃風定雲墨色秋  
天漠漠向昏黑布衾多年冷如鐵嬌兒惡卧踏裏裂  
床床屋漏無乾處雨脚如麻未斷絕自經喪亂少睡  
眠長夜沾濕何由徹安得廣廈千萬間大庇天下寒  
士俱歡顏風雨不動安如山嗚呼何時眼前突兀見  
此屋吾廬獨破受凍死亦足

越王樓歌

綿州刺史何磊落顯慶年中越王作孤城西北起高  
樓碧瓦朱甍照城郭樓下長江百丈清山頭落日半  
輪明君王舊跡今人賞轉見千秋萬古情

燕飲類

醉時歌

公自註贈廣文館學士鄭虔

諸公衮衮登臺省廣文先生官獨冷甲第紛紛厭梁  
肉廣文先生飯不足先生有道出羲皇先生有才過  
屈宋德尊一代常坎軻名垂萬古知何用杜陵野客  
人更嗤被褐短窄鬢如絲日糶太倉五升米時赴鄭  
老同襟期得錢卽相覓沽酒不復疑忘形到爾汝痛  
飲真吾師清夜沉沉動春酌簷前細雨燈花落但覺  
高歌有鬼神焉知餓死填溝壑相如有才親滌器子

雲識字終投閣先生早賦歸去來石田茅屋荒蒼苔  
儒術於我何有哉孔丘盜跖俱塵埃不須聞此意慘  
愴生前相遇且銜盃

蘇端薛復筵簡薛華醉歌

文章有神交有道端復得之名譽早愛客滿堂盡豪  
傑開筵上日思芳草安得健步移遠梅亂插繁花向  
晴昊千里猶殘舊冰雪百壺且試開懷抱垂老惡聞  
戰鼓悲急觴為緩憂心擣少年努力縱談笑看我形  
容已枯稿座中薛華善醉歌歌辭自作風格老近來  
海內為長句汝與山東李白好何劉沈謝力未工才

兼鮑照愁絕倒諸生頗盡新知樂萬事終傷不自保  
氣酣日落西風來願吹野水添金杯如澠之酒常快  
意亦知窮愁安在哉忽憶雨時秋井塌古人白骨生  
青苔如何不飲令心哀

飲中八仙歌

知章騎馬似乘船眼花落井水底眠汝陽三斗始朝  
天道逢麴車口流涎恨不移封向酒泉左相日興費  
萬錢飲如長鯨吸百川銜盃樂聖稱避賢宗之瀟洒  
美少年舉觴白眼望青天皎如玉樹臨風前蘇晉長  
齋繡佛前醉中往往愛逃禪李白一斗詩百篇長安

市上酒家眠天子呼來不上船自稱臣是酒中僊張  
旭三盃草聖傳脫帽露頂王公前揮毫落紙如雲烟  
焦遂五斗方卓然高談雄辯驚四筵

冬末以事之東都湖城遇孟雲卿復歸劉顥  
宅宿宴飲散因爲醉歌

疾風吹塵暗河縣行子隔年不相見湖城城南一開  
眼駐馬偶識雲卿面向非劉顥爲地主嬾迴鞭轡成  
高宴劉侯歡我攜客來置酒張燈促華饌且將款曲  
終今夕休語艱難尚酣戰照室紅爐促曙光縈窓素  
月垂文練天開地裂長安陌寒盡春生洛陽殿豈知  
驅車復同軌可惜刻漏隨更箭人生會合不可常  
樹鷄鳴淚如綫

病後過王倚飲贈歌

麟角鳳觜世莫識煎膠續絃竒自見尚看王生抱此  
懷在於甫也何由羨且遇王生慰疇昔素知賤子其  
貧賤酷見凍餒不足耻多病沉年苦無健王生怪我  
顏色惡答云伏枕艱難遍瘡癘三秋孰可忍寒熱百  
日相交戰頭白眼暗坐有胝肉黃皮皺命如綫惟生  
哀我未平復爲我力致美殽膳遣人向市賒香粳喚  
婦出房親自饌長安冬蒚酸且綠金城土酥靜如練

兼求畜豕且割鮮密沽斗酒諧終宴故人情味晚誰  
似令我手脚輕欲旋老馬爲駒總不虛當時得意况  
深眷但使殘年喫飽飯只願無事長相見

閩鄉姜七少府設鱸戲贈長歌

姜侯設鱸當嚴冬昨日今日皆天風河凍未漁不易  
得鑿冰恐侵河伯宮饕人受魚鮫人手洗魚磨刀魚  
眼紅無聲細下飛碎雪有骨已剝背春葱偏勸腹腴  
愧年少軟炊香飯緣老翁落碁何曾白紙濕放筋未  
覺金盤空新歡便飽姜侯德清觴異味情屢極東歸  
貪路自覺難欲別上馬身無力可憐爲人好心事於  
我見子真顏色不恨我衰子貴時悵望日爲今相憶

觀打魚歌

公以寶應元年送嚴武至綿州時作

綿州江水之東津魴魚鱖鱖色勝銀漁人漾舟沉大  
網截江一擁數百鱗衆魚常才盡却棄赤鯉騰出如  
有神潛龍無聲老蛟怒迴風颯颯吹沙塵壅子在右  
揮霜刀繪飛金盤白雪高徐州秃尾不足憶漢陰槎  
頭遠遁逃魴魚肥美知第一旣飽驩娛亦蕭瑟君不  
見朝來割素鬢咫尺波濤永相失

器物類

聽楊氏歌

佳人絕代歌獨立發皓齒滿堂慘不樂響下青虛裏  
江城帶素月况乃清夜起老夫悲暮年壯士淚如水  
玉盃久寂寞金管迷宮徵勿云聽者疲愚智心盡死  
古來傑出土豈特一知己吾聞昔秦青傾側天下耳  
觀公孫大娘弟子舞劍器行

大曆二年十月十九日夔府別駕元持宅見臨  
穎李十二娘舞劍器壯其蔚跂問其所師曰余  
公孫大娘弟子也開元三載余尚童稚記於郾  
城觀公孫氏舞劍器渾脫瀏灑頓挫獨出冠時

自高頭宜春梨園二技坊內人洎外供奉曉是  
舞者聖文神武皇帝初公孫一人而已玉貌錦  
衣况予白首今茲弟子亦匪盛顏既辨其由來  
知波瀾莫二撫事慷慨聊為劍器行往者吳人  
張旭善草書書帖數嘗於鄴縣見公孫大娘舞  
西河劍器自此章書長進豪蕩感激即公孫可  
知矣

昔有佳人公孫氏一舞劍器動四方觀者如山色阻  
喪天地為之久低昂燿如羿射九日落矯如羣帝驟  
龍翔來如雷霆收震怒罷如江漢凝清光絳唇朱袖

兩寂寞。晚有弟子傳芬芳。臨穎美人在白帝。妙舞此  
 曲神揚揚。與余問答既有以。感時撫事增惋傷。先帝  
 侍女八千人。公孫劍器初第一。五十年間似反掌。風  
 塵鴻洞昏王室。梨園弟子散如煙。女樂餘姿映寒日。  
 金粟堆南木已拱。瞿塘石城草蕭瑟。玳筵急管曲復  
 終。樂極哀來月東出。老夫不知其所往。足繭荒山轉  
 愁絕。

荆南兵馬使太常卿趙公大食刀歌

太常樓船聲嗷嘈。問兵刮寇超下牢。牧出令奔飛百  
 艘。猛蛟突獸紛騰逃。白帝寒城駐錦袍。玄冬示我胡

國刀壯士短衣頭。虎毛憑軒拔鞘天。為高翻風轉日  
 木怒號。冰翼雲淡傷哀猱。鑄錯碧鬣鷗鷁膏。鋸鏘已  
 瑩虛秋濤。鬼物撇捩亂坑壕。蒼水使者捫赤條。龍伯  
 國人罷釣鰲。芮公迺首顏色勞。分闡救世用賢豪。趙  
 公玉立高歌起。攬環結珮相終始。萬歲持之護天子  
 得君亂絲與君理。蜀江如線針如水。荆岑彈丸心未  
 已。賊臣惡子休干紀。魑魅魍魎徒為耳。妖腰亂領敢  
 欣喜。用之不高亦不痺。不似長劍須天倚。吁嗟光祿  
 英雄弭大食。寶刀聊可比。丹青宛轉麒麟裏。光芒六  
 合無泥滓。

書畫類

畫鵲行

高堂見生鵲，颯爽動秋骨。初驚無拘孿，何得立突兀。  
乃知畫師妙，巧刮造化窟。寫此神俊姿，充君眼中物。  
烏鵲滿樛枝，軒然恐其出。側腦看青霄，寧爲衆禽沒。  
長翮如刀劍，人寰可超越。乾坤空崢嶸，粉墨且蕭瑟。  
緬思雲沙際，自有煙霧質。吾今意何傷，顧步獨紆鬱。

李潮八分小篆歌

李潮善小篆，師李斯。嶧山碑見稱于時。

蒼頡鳥跡既茫昧，字體變化如浮雲。陳倉石鼓又已  
訛，大小二篆生八分。秦有李斯漢蔡邕，中間作者寂  
不聞。嶧山之碑野火焚，棗木傳刻肥失真。苦縣光  
和尚骨立，書貴瘦硬方通神。惜哉李蔡不復得，吾甥李  
潮下筆親。尚書韓擇木，騎曹蔡有隣。開元已來數八  
分，潮也奄有二子成三人。况潮小篆逼秦相，快劍長  
戟森相向。八分一字值百金，蛟龍盤拏肉屈強。吳郡  
張顛誇草書，草書非古空雄壯。豈知吾甥不流宕，丞  
相中郎丈人行。巴東逢李潮，逾月求我歌。我今衰老  
才力薄，潮乎潮乎柰如何。

奉先劉少府新畫山水障歌

堂上不合生楓樹，怪底江山起煙霧。聞君掃却赤縣圖，乘興遣畫滄洲趣。畫師亦無數，好手不可遇。對此融心神，知君重毫素。豈但祁岳與鄭虔，筆跡遠過楊契丹。得非玄圃裂，無乃瀟湘翻。悄然坐我天姥下，耳畔已似聞清猿。反思前夜風雨急，乃是蒲城鬼神入。元氣淋漓障猶濕，真宰上訴天應泣。野亭春還雜花遠，漁翁暝踏孤舟立。滄浪水深青溟濶，欹岸側島秋毫末。不見湘妃鼓瑟時，至今斑竹臨江活。劉侯天機精，愛畫入骨髓。自有兩兒郎，揮灑亦莫比。大兒聰明到，能添老樹巔。崖裏小兒心，孔開貌得山僧及童子。

若耶溪雲門寺吾獨胡爲在泥滓青鞋布鞵從此始

戲題王宰畫山水圖歌

王宰家於西蜀能畫山水意出象外上元元年在成都作

十日畫一水五日畫一石能事不受相促迫王宰始肯留真跡壯哉崑崙方壺圖掛君高堂之素壁巴陵洞庭日本東赤岸水與銀河通中有雲氣隨飛龍舟人漁子入浦淑山水畫亞洪濤風尤工遠勢古莫比咫尺應須論萬里焉得并州快剪刀剪取吳松半江水

木言夕集 卷之四 三五  
題李尊師松樹障子歌

李尊師卽玄都道士

老夫清晨梳白頭玄都道士來相訪握髮呼兒延入  
戶手提新畫青松障障子松林靜杳冥憑軒忽若無  
丹青陰崖却承霜雪榦偃蓋反走虬龍形老夫平生  
好奇古對此興與精靈聚已知仙客意相親更覺良  
工心獨苦松下丈人巾屨同偶坐似是商山翁悵望  
聊歌紫芝曲時危慘淡來悲風

戲帝偃爲雙松圖歌

天下幾人畫古松畢宏已老帝偃少絕筆長風起纖  
末滿堂動色嗟神妙兩株慘裂苔蘚皮屈鐵交錯迴  
高枝白摧朽骨龍虎死黑入太陰雷雨垂松根胡僧  
憇寂寞龐眉皓首無住著偏袒右肩露雙脚葉裏松  
子僧前落帝侯帝侯數相見我有一匹好東絹重之  
不減錦繡段已令拂拭光凌亂請公放筆爲直榦

姜楚公畫角鷹歌

姜皎善畫鷹鳥玄宗在藩邸皎爲尚衣奉  
御有先識之明玄宗卽位累官太常卿封

楚國公

楚公畫鷹鷹戴角殺氣森森到幽朔觀者貪愁掣臂

飛盡師不是無心學此鷹寫真在左綿却嗟真骨遂  
虛傳梁間燕雀休驚怕亦未搏空上九天

### 天育驃騎歌

天育馬廐名驃騎良馬名

吾聞天子之馬走千里今之畫圖無乃是是何意態  
雄且傑駿尾蕭梢朔風起毛爲綠縹兩耳黃眼有紫  
焰雙瞳方矯矯龍性合變化卓立天骨森開張伊昔  
太僕張景順監牧攻駒閱清峻遂令大奴字天育別  
養驥子憐神俊當時四十萬匹馬張公嘆其材盡下  
故獨寫真傳世人見之座右久更新年多物化空形

影鳴呼健步無由騁如今豈無驥裹與驂驅時無王  
良伯樂死卽休

### 題壁上常偃畫馬歌

常偃京兆人寓居于蜀工畫馬實韓幹之  
亞其松石尤工

常侯別我有所適知我憐君畫無敵戲拈秃筆掃驂  
驅欲見騏驎出東壁一匹齧草一匹嘶坐着千里當  
霜蹄時危安得真致此與人同生亦同死

### 鳥獸顛

### 義鶻行

鶻呀鶻鷲鳥中最健捷者

陰崖有蒼鷹，養子黑柏巔。白蛇登其巢，吞噬恣朝餐。  
雄飛遠求食，雌者鳴辛酸。力強不可制，黃口無半存。  
其父從西歸，翻身入長烟。斯須領健鶻，痛憤寄所宣。  
斗上捩孤影，數哮來九天。脩鱗脫遠枝，巨桑折老拳。  
高空得蹭蹬，短草辭蜿蜒。折尾能一掉，飽腸已皆穿。  
生雖滅衆雛，死亦垂千年。物情有報復，快意貴目前。  
茲實鷲鳥最急難，心惘然。功成失所往，用捨何其賢。  
近經滴水涓，此事樵夫傳。飄蕭覺素髮，凜欲衝儒冠。  
人生許與分，亦在顧盼間。聊爲義鶻行，永激壯士肝。

朱鳳行

君不見見瀟湘之山，衡山高山巔。朱鳳聲嗷嗷，側身長  
顧求其曹。翅垂口噤心甚勞，下愍百鳥在羅網。黃雀  
最小猶難逃，願分竹實及螻蟻。盡使鴟梟相怒號。

杜鵑行

君不見見昔日蜀天子，化爲杜鵑似老鳥。寄巢生子不  
自啄，羣鳥至今爲哺雛。雖同君臣有舊禮，骨肉滿眼  
身羸孤。業工竄伏深樹裏，四月五月偏號呼。其聲哀  
痛口流血，所訴何事常區區。爾豈摧殘始發憤，羞帶  
羽翮傷形愚。蒼天變化誰料得，萬事反覆何所無。萬  
事反覆何所無，豈憶當殿羣臣趨。

杜鵑行

古時杜宇稱望帝魂作杜鵑何微細跳枝窳葉樹木  
 中捨伴暫換雌隨雄毛衣慘黑貌憔悴衆鳥安肯相  
 尊崇墮形不敢柄華屋短翮惟願巢深叢穿皮啄朽  
 骨欲禿苦饑始得食一虫誰言養雛不自哺此語亦  
 足爲愚蒙聲音咽咽如有謂號啼畧與嬰兒同口乾  
 垂血轉迫促似欲上訴於蒼穹蜀人間之皆起立至  
 今數學傳遺風迺知變化不可窮豈知昔日居深宮  
 嬪嬙左右如花紅

呀鵑行

呀虛口也

病鵑孤飛俗眼醜每夜江邊宿衰柳清秋落日已側  
 身過鴈歸鷓錯迴首緊腦雄姿迷所向踈翮稀毛不  
 可狀強神迷復皂鵬前俊材早在蒼鷹上風濤颯颯  
 寒山陰熊羆欲蟄龍蛇深念爾此時有一擲失聲濺  
 血非其心

縛鷄行

小奴縛鷄向市賣鷄被縛急相喧爭家中厭雞食蟲  
 蟻不知賣鷄還遭烹蟲鷄於人何厚薄吾叱奴人解  
 其縛雞蟲得失無了時注目寒江倚山閣

白鳧行

君不見黃鵠高於五尺童化爲白鳧似老翁故畦遺  
穗已蕩盡天寒歲暮波濤中鱗介腥膻素不食終日  
恐饑西復東魯門鷄鷄亦蹭蹬聞道如今猶避風

### 沙苑行

沙苑一名沙阜唐置沙苑監掌牧養

君不見左輔白沙如白水繚以周墻百餘里龍媒昔  
是渥洼生汗血今稱獻於此苑中駉牝三千匹豐草  
青青寒不死食之豪健西域無每歲攻駒冠邊鄙王  
有虎臣司苑門入門天廐比雲屯驪驢一骨獨當御  
春秋二時歸至尊至尊內外馬盈億伏櫪在坰空大  
存逸群絕足信殊傑倜儻權奇難具論纍纍埴阜藏  
奔突往往坡陀縱超越角壯翻同麋鹿遊浮深簸蕩  
鼉鼉窟泉出巨魚長比人丹砂作屋黃金鱗豈知異  
物同精氣雖未成龍亦有神

### 瘦馬行

東郊瘦馬使我傷骨骼硤兀如堵墻絆之欲動轉欹  
側此豈有意仍騰驤細看六印帶官字衆道三軍遺  
路傍皮乾剝落雜泥滓毛暗蕭條連雪霜去歲奔波  
逐餘寇驂驅不慣不得將士卒多騎內廐馬惆悵恐  
是病乘黃當時歷塊誤一蹶委棄非汝能周防見人

慘澹若哀訴，失主錯莫無晶光。天寒遠放鴈爲伴，日暮不收烏啄瘡。誰家且養願終惠，更試明年清草長。

### 驄馬行

公自註太常梁卿勅賜馬也李鄧公愛而有之命甫製詩

鄧公馬癖人共知，初得花驄大宛種。夙昔傳聞思一見，牽來左右神皆悚。雄姿逸態何嶒嶒，顧影驕嘶自矜寵。隅目青熒夾鏡懸，肉鬣碾礪連錢動。朝來久試華軒下，未覺千金滿高價。赤汗微生白雪毛，銀鞍却覆香羅帕。卿家舊物公能取，天廐真龍此其亞。晝洗

須騰涇渭深，朝趨可刷幽并夜。吾聞良驥老始成，此馬數年人更驚。豈有四蹄疾如鳥，不與八駿俱先鳴。時俗造次那得致，雲霧晦冥方降精。近聞下詔喧都邑，肯使騏驎地上行。

### 高都護驄馬行

按史開元末以高仙芝爲安西副都護

安西都護胡青驄，聲價歛然來向東。此馬臨陣久無敵，與人一心成大功。功成惠養隨所致，飄飄遠自流沙。至雄姿未受伏櫪恩，猛氣猶思戰場利。腕促蹄高如培鐵，交河幾蹴曾冰裂。五花散作雲滿身，萬里方

看汗流血長安壯兒不敢騎走過掣電傾城知青絲  
絡頭爲君老何由却出橫門道

李鄠縣丈人胡馬行

丈人駿馬名胡驢名年避胡過金牛迴鞭却走見天  
子朝飲漢水暮靈州自矜胡驢奇絕代乘出千人萬  
人愛一聞說盡急難林轉益愁向駑駘輩頭上銳耳  
批秋竹脚下高蹄削寒玉始知神龍別有種不比俗  
馬空多肉洛陽大道時再清累日喜得俱東行鳳臆  
龍鬣未易識則身注目長風生

惜別行送劉僕射判官

僕射宰相以下居四等判官其屬也

聞道南行市駿馬不限匹數軍中須襄陽幕府天下  
異主將儉省憂艱虞祇收壯健勝鐵甲豈因格鬪求  
龍駒而今西北自反胡騏驎蕩盡一匹無龍媒真種  
在帝都子孫未落西南隅向非戎事備征伐君肯辛  
苦越江湖江湖凡馬多顛顛衣冠往往乘蹇驢梁公  
富貴於身疎號令明白人安居俸錢時散士子盡府  
庫不爲驕豪虛以茲報主寸心赤氣却西戎迴北狄  
羅網群馬藉馬多氣用驅除出金帛劉侯奉使光推  
擇滔滔才畧滄溟窄杜陵老翁秋繫船扶病相識長

沙驛強梳白髮提胡盧手兼菊花路傍摘九州兵革  
浩茫茫三歎聚散臨重陽當杯對客恐涕淚不覺老  
夫神內傷

木類

古栢行

按史成都有先主廟武侯祠堂附焉

孔明廟前有老栢柯如青銅根如石霜皮溜雨四十  
圍黛色參天二千尺君臣已與時際會樹木猶為人  
愛惜雲來氣接巫峽長日出寒通雪山白憶昨路遠  
錦亭東先主武侯同闕宮崔嵬枝幹郊原古窈窕丹

青戶牖空落落盤踞雖得地冥冥孤高多烈風扶持  
自是神明力正直元因造化功大厦如傾要梁棟萬  
牛迴首丘山重不露文章世已驚未辭剪伐誰能送  
苦心豈免容螻蟻香葉終經宿鸞鳳志士幽人莫怨  
嗟古來材大難為用

海棕行

棕行當作于冬切凡花木以海為名者悉  
從海上來如海棠之類是也

左綿公館清江濱海棕一株高入雲龍鱗犀甲相錯  
落蒼稜白皮十抱文自是眾木亂紛紛海棕焉知身

出羣移栽北辰不可得時有西域胡僧識

雜賦類

同元使君春陵行

元使君名結號次山公自序覽道州元使君結春陵行兼賊退後示官吏作二首志之曰當天子分憂之地效漢官良吏之日今盜賊未息知民疾苦得結輩十數公落落然參錯天下爲邦伯萬物吐氣天下少安可待矣不意復見比典體製微婉頓挫之詞感而有詩增諸卷軸簡知我者不必

寄元

遭亂髮盡白轉衰病相嬰沉綿盜賊際狼狽江漢行歎時藥力薄爲客羸瘵成吾人詩家秀博采世上名粲粲元道州前聖畏後生觀乎春陵作歛見俊哲情復覽賊退篇結也實國楨賈誼昔流勸匡衡常引經道州憂黎庶詞氣浩縱橫兩章對秋月一字借華星致君唐虞際純朴憶大庭何時降璽書用爾爲丹青獄訟久衰息豈惟偃甲兵悽惻念誅求薄歛近休明乃知正人意不苟飛長纓涼飈振南岳之子寵若驚色沮金印大興含滄溟清我多長卿病日夕思朝廷

水言分數 卷之四 三四 三百五十四  
肺枯渴太甚，漂泊公孫城。呼兒且帟筆，隱几臨軒楹。  
作詩呻吟內，墨淡字欹傾。感彼危苦詞，庶幾知者聽。  
相從歌贈嚴二別駕

別駕官名秩六百石，以佐府治中。別駕從事州通判沿革無常，唐以堂吏朱儉爲華州別駕，給事郎蕭倣駁曰：別駕古爲治中從事，與刺史別乘則別駕稱從事，其來尚矣。嚴二梓州人，卽爲梓州別駕。

我行入東川，十步一回首。成都亂罷氣蕭索，浣花草堂亦何有。梓州豪俊大者誰，本州從事知名久。把臂開樽飲我酒，酒酣擊劍蛟龍吼。烏帽拂塵青螺粟，紫衣將炙緋衣走。銅盤燒蠟光吐日，夜如何其初促膝。黃昏始扣主人門，誰謂俄頃膠在漆。萬事盡付形骸外，百年未見歡娛畢。神傾意豁真佳士，久客多憂今愈疾。高視乾坤又可愁，一體交態同悠悠。垂老遇君未恨晚，似君須向古人求。

偏側行

公自註贈畢曜

偏側何偏側，我居巷南子巷北。可恨鄰里間，十日不一見顏色。自從官馬送還官，行路難行澁如棘。我貧

無乘非無足昔者相遇今不得實不是愛微軀又非  
關足無力徒步翻愁官長怒此心炯炯君應識曉來  
急雨春風顛睡美不聞鐘鼓傳東家寒驢許借我泥  
滑不敢騎朝天已令請急會通籍男兒性命絕可憐  
焉能終日心拳拳憶君誦詩神凜然辛夷始花亦已  
落况我與子非壯年街頭酒價常苦貴方外酒徒稀  
醉眠速宜相就飲一斗恰有二百青銅錢

去矣行

天寶十四載公年四十四在嚴武幕中將  
有去志明年正月遂歸浣花溪上

君不見鵠上鷹一飽則飛掣而能作堂上燕銜泥附  
炎熱野人曠蕩無覩顏豈可久在王侯間未試囊中  
食玉法明朝且入藍田山

少年行二首

莫笑田家老瓦盆自從盛酒長兒孫傾銀注玉驚人  
眼共醉終同卧竹根  
巢燕養雛渾去盡江花結子已無多黃衫年少來宜  
數不見堂前東逝波

少年行

馬上誰家白面郎臨階下馬坐人床不通姓字麓豪

狙音疽休屬

鏡音擇

鴛音加屬屬

鴛音水鳥似鴛

鴛音倉一鴛鳥名

颯音殺類凡也  
又凡戶

湫以田切音嗽水名  
又水池名

復音福一惟正妻

甚指點銀瓶索酒甞

乾元中寓居同谷縣作歌七首

有客有客字子美白頭亂髮垂過耳歲拾橡栗隨狙  
公天寒日暮山谷裏中原無書歸不得手脚凍皴皮  
肉死嗚呼一歌兮歌已哀悲風為我從天來

長鏡長鏡白木柄我生託子以為命黃精無苗山雪  
盛短衣數挽不掩脛此時與子空歸來男呻女吟四  
壁靜嗚呼二歌兮歌始放閭里為我色惆悵

有弟有弟在遠方三人各瘦何人強生別展轉不相  
見胡塵暗天道路長東飛鴛鴦後鵝鷓安得送我置  
汝傍嗚呼三歌兮歌三發汝歸何處收兄骨

有妹有妹在鍾離良人早歿諸孤痴長淮浪高蛟龍  
怒十年不見來何時扁舟欲往箭滿眼杳杳南國多  
旌旗嗚呼四歌兮歌四奏竹林為我啼清晝

四山多風溪水急寒雨颼颼枯樹濕黃蒿古城雲不  
開白狐跳梁黃狐立我生胡為在窮谷中夜起坐萬  
感集嗚呼五歌兮歌正長魂招不來歸故鄉

南有龍兮在山湫古木龍從枝相樛木葉黃落龍正  
蟄腹蛇東來水上遊我行恠此安敢出拔劍欲斬且  
復休嗚呼六歌兮歌思遲溪壑為我迴春姿

男兒生不成名身已老三年饑走荒山道長安卿相  
多少年富貴應須致身早山中儒生舊相識但話宿  
昔傷懷抱嗚呼七歌兮情終曲仰視皇天白日速

戲贈閩鄉秦少府短歌

去年行宮當太白朝廻君是同心舍客同心不減骨  
親每語見許文章伯今日時清兩京道相逢若覺人  
情好昨夜邀懽樂更無多才依舊能潦倒

錦樹竹

木葉經霜色紅若錦

今日苦短昨日休歲云暮矣增離憂霜凋碧樹作錦

樹萬壑東逝無停留荒戍之城石色古東郭老人住  
青丘飛書白帝營斗粟琴瑟几杖柴門幽青草萋萋  
盡枯死天驥跛足隨羸牛自古聖賢多薄命姦雄惡  
少封公侯故國三年一消息終南渭水寒悠悠五陵  
豪貴反顛倒鄉里小兒狐白裘生男墮地要膂力生  
女富貴傾邦國莫愁父母少黃金天下風塵兒亦得

嚴氏溪放歌

天下甲兵未盡銷豈免溝壑常漂漂劔南歲月不可  
度邊頭公卿仍獨驕費心姑息是一役肥肉大酒徒  
相要嗚呼古人已糞土獨覺志士甘漁樵况我飄轉

無定所終日慼慼忍羈旅秋宿霜溪素月高喜得與  
子常夜語東遊西還力實倦從此將身更何許知子  
松根長茯苓遲暮有意來同煮

### 虎牙行

虎牙山名山下有灘曰虎牙灘蕭銑屯兵  
於此

秋風歛吸吹南園天地慘慘無顏色洞庭揚波江漢  
迴虎牙銅柱皆傾側巫峽陰岑朔漠氣峯巒窈窕溪  
谷黑杜鵑不來猿狖寒山鬼幽憂雪霜逼楚老長嗟  
憶炎瘴二尺角弓兩斛力壁立石城橫塞起金錯旌

竿滿雲直漁陽突騎獵青丘大戎鏃甲聞丹極八荒  
十年防盜賊征戍誅求寡妻哭遠客中宵淚霑臆

### 負薪行

夔州巫峽之民男爲商女當門戶坐肆於  
市廛擔負於道路者皆婦人也

夔州處女髮半華四五十無夫家更遭喪亂嫁不  
售一生抱恨堪咨嗟土風坐男使女立應當門戶女  
出入十猶八九負薪歸賣薪得錢應供給至老雙鬟  
只垂頸野花山葉銀釵並筋力登危集市門死生射  
利兼鹽井面粧首飾雜啼痕地褊衣寒困石根若道

巫山女粗醜何得此有昭君村

最能行

負薪行以言夔州之女最能行以言歸州  
之男故一以昭君一以屈原証之又按最  
能二字操舟水手之稱猶長年三老之類  
峽中丈夫絕輕死少在公門多在水富豪有錢駕大  
舸貧窮取給行牒子小兒學問止論語大兒結束隨  
商旅歆帆側拖入波濤撇旋梢潰無險阻朝發白帝  
暮江陵頃來目擊信有徵瞿塘漫天虎鬚怒歸州長  
年與最能此鄉之人氣量窄快競南風疎北客若道  
土無英雄才何得山有屈原宅

惜別行送向卿進奉端午御衣之上都

肅宗昔在靈武城指揮猛將收咸京向公泣血洒行  
殿佐佑卿相乾坤平逆胡冥冥隨烟燼卿家兄弟功  
名震麒麟閣畫鴻鴈行紫極出入黃金印尚書勲業  
超千古雄鎮荊州繼吾祖裁縫雲霧成御衣拜跪題  
封賀端午向卿將命寸心赤青山落日江湖白卿到  
朝廷說老翁漂零已是滄浪客

醉歌行贈公安顏少府請顧八題壁

顏卽顏十顧八名况東吳人時三人同飲

至醉

神仙中人不易得，顏氏之子才孤標。天馬長鳴待駕馭，秋鷹整翮當雲霄。君不見東吳顧文學，君不見西漢杜陵老。詩家筆勢君不嫌，詞翰升堂爲君掃。是日霜風凍七澤，烏蠻落照銜赤壁。酒酣耳熱忘頭白，感君意何所惜。一爲歌行歌主客。

白絲行

繰絲須長不須白，越羅蜀錦金粟尺。象床玉手亂殷紅，萬草千花動凝碧。已悲素質隨時染，裂下鳴機色相射。美人細意熨帖平，裁縫滅盡針線跡。春天衣著爲君舞，蛺蝶飛來黃鸝語。落絮游絲亦有情，隨風照日宜輕舉。香汗清塵汗顏色，開新合故置何許。君不見才士汲引難，恐懼棄捐恐羈旅。

百憂集行

憶年十五心尚孩，健如黃犢走復來。庭前八月梨棗熟，一日上樹能千迴。卽今倏忽已五十，坐卧只多少。行立強將笑語供，主人悲見生涯百憂集。入門依舊四壁空，老妻覩我顏色同。癡兒未知父子禮，叫怒索飯啼門東。

莫相疑行

此詩有謂為郭英义而作

男兒生無所成頭皓白牙齒欲落真可惜憶獻三賦  
蓬萊宮自恠一日聲輝赫集賢學士如堵墻觀我落  
筆中書堂往時文彩動人主此日饑寒趨路傍晚將  
未契託年少當面輸心背面笑寄謝悠悠世上兒不  
爭好惡莫相疑

短歌行贈王郎司直

司直時為蜀州刺史

王郎酒酣拔劍斫地歌莫哀我能拔爾抑塞磊落之  
奇才豫樟翻風白日動鯨魚跋浪滄溟開且脫劍佩  
休徘徊西得諸侯棹錦水欲向何門跋珠履仲宣樓  
頭春已深青眼高歌望吾子眼中之人吾老矣

赤霄行

孔雀未知牛有角渴飲寒泉逢舐觸赤霄玄圃須往  
來翠尾金花不辭辱江中淘河嚇飛燕銜泥却落羞  
華屋皇孫猶會蓮勺困衛莊見貶傷其足老翁慎莫  
恠少年葛亮貴和書有篇丈夫垂名動萬年記憶細  
故非高賢

貧交行

此蓋泛言今人交不如古以警世俗  
翻手作雲覆手雨紛紛輕薄何須數君不見管鮑貧

西日直處以下  
王日直處以下  
捨此何向

木言分夢  
卷之四  
四三  
時交此道今人棄如土

短歌行送邛州祁錄事歸合州因寄蘇使君  
前者途中一相見人事經年記君面後生相勸何寂  
寥君有長才不貧賤君今起柁春江流余亦沙邊具  
小舟幸為達書賢府主江花未盡會江樓

五言絕

雜賦類

八陣圖

諸葛亮輔漢昭烈功蓋天下作八陣圖  
三其一在四川成都府新都縣牟彌鎮其  
一在碁盤市其一在夔州府城南其陣聚  
細石為之各高五尺皆布列相當中間相  
去九尺或為人散亂及夏水所沒水退復  
如故晉桓溫伐蜀經之以為常山蛇勢公  
時在夔州此必指在夔者言

功蓋三分國名成八陣圖江流石不轉遺恨失吞吳  
武侯廟

廟在夔州府八陣臺下

遺廟丹青落空山草木長猶聞辭後主不復卧南陽  
絕句二首

遲日江山麗，春風花草香。泥融飛燕子，沙暖睡鴛鴦。

其二

江碧鳥逾白，山青花欲然。今春看又過，何日是歸年。

絕句

江邊踏青罷，迴首見旌旗。風起春城暮，高樓鼓角悲。

卽事

百寶裝腰帶，真珠絡臂鞵。笑時花近眼，舞罷錦纏頭。

歸鴈

春來萬里客，亂定幾年歸。腸斷江城鴈，高高向北飛。

因崔五侍御寄高彭州適一絕

百年已過半，秋至轉饑寒。為問彭州牧，何時救急難。

絕句六首

日出籬東水，雲生舍北泥。竹高鳴翡翠，沙僻舞鸚鵡。

其二

藹藹花葉亂，飛飛蜂蝶多。幽棲身懶動，客至欲如何。

其三

急雨梢溪足，斜暉轉樹腰。隔巢黃鳥並，翻藻白魚跳。

其四

鑿井交櫻葉，開渠斷竹根。扁舟輕裊纜，小逕曲通村。

其五

舍下笋穿壁，亭前藤刺簷。地晴絲冉冉，江白草纖纖。  
其六

江動月移石，溪虛雲傍花。鳥棲知故道，帆過宿誰家。  
絕句三首

此係新添得於慎文肅公家故書中

聞道巴山裏，春船正好行。都將百年興，一望九江城。

其二

水檻溫江口，茆堂石笋西。移船先主廟，洗藥浣花溪。

其三

漫道春來好，狂風大放顛。吹花隨水去，翻却釣魚船。

荅鄭十七郎一絕

雨後過畦潤，花殘步履遲。把文驚小陸，好客見當時。

復愁十二首

人烟生處僻，虎跡過新蹄。野鶻翻窺草，村船逆上溪。

其二

釣艇收繆盡，昏鴉接翅稀。月生初學扇，雲細不成衣。

其三

萬國尚防寇，故園今若何。昔歸相識少，早已戰場多。

其四

身覺省郎在家，須農事歸年深。荒草徑老恐失柴扉。

其五

金絲鏤箭鏃、皂尾掣旗竿、一自風塵起、猶嗟行路難

其六

貞觀銅牙弩、開元錦獸張、花門小箭好、此物棄沙場

其七

胡虜何曾盛、干戈不肯休、閭閻聽小子、談笑覓封侯

其八

今日翔麟馬、先宜駕鼓車、無勞問河北、諸將覺榮華

其九

任轉江淮粟、休添苑囿兵、由來貔虎士、不滿鳳凰城

其十

江上亦秋色、火雲終不移、巫山猶錦樹、南國且黃鸝

其十一

每恨陶彭澤、無錢對菊花、如今九日至、自覺酒須賒

其十二

病減詩仍拙、吟多意有餘、莫看江摠老、猶被賞時魚

王錄事許脩草堂、貲不到聊小詰

為嘆王錄事、不寄草堂貲、昨屬愁春雨、能忘欲漏時

七言絕

時事類

黃河二首

時吐蕃入寇嚴鄭公破吐蕃七萬衆于當  
狗城遂收鹽州加檢校吏部尚書

黃河北岸海西軍  
椎鼓鳴鐘天下聞  
鐵馬長鳴不知  
數胡人高鼻動成羣

黃河西岍是吾蜀  
欲須供給家無粟  
願驅衆庶戴君  
王混一車書棄金玉

三絕句

前年渝州殺刺史  
今年開州殺刺史  
羣盜相隨劇虎  
狼食人更肯留妻子

二十一家同入蜀  
唯殘一人出駱谷  
自說二女嚙臂  
時回頭却向秦雲哭  
殿前兵馬雖驍雄  
縱暴略與羌渾同  
聞道殺人漢水  
上婦女多在官軍中

喜聞盜賊蕃寇總退口號五首

按史大曆三年吐蕃入寇十月路嗣恭及  
吐蕃戰于靈州敗之

蕭關隴水入官軍  
青海黃河卷寒雲  
北極轉愁龍虎  
氣西戎休縱犬羊羣

贊普多教使入秦  
數通和好止烟塵  
朝廷忽用哥舒

將殺伐虛悲公主親

崆峒西極過崑崙駝馬由來擁國門逆氣數年吹路

斷蕃人聞道漸星奔

勃律天西采玉河堅昆碧盞最來多舊隨漢使千堆

寶少答胡王萬匹羅

今春喜氣滿乾坤南北東西拱至尊大曆三年調玉

燭玄元皇帝聖雲孫

承聞河北諸道節度入朝歡喜口號絕句十

二首

按河北自肅宗寶應元年史朝義未縊死

前諸鎮已多降者死後無不來歸諸道節

度李隱仙辛雲京之類此皆郭子儀之力

也

祿山作逆降天誅更有思明亦已無洵洵人寰猶不

定時時戰鬪欲何須

社稷蒼生計必安蠻夷雜種錯相干周宣漢武今王

是孝子忠臣後代看

喧喧道路多謠謠河北將軍盡入朝始是乾坤王室

正却教江漢客魂銷

北道諸公無表來茫然世事遣人猜擁兵相學干戈

銳使者徒勞萬里廻

鳴玉鏘金盡正臣、脩文偃武不無人、興王會盡妖氛氣、聖壽宜過一萬春、

英雄見事若通神、聖哲爲心小一身、燕趙休矜出佳麗、宮闈不擬選才人、

抱病江天白首郎、空山樓閣暮春光、衣冠是日朝天子、草奏何人入帝鄉、

澶漫山東一百州、削成如桡抱青丘、包茅重入歸關內、王祭還供盡海頭、

東逾遼水北溟沱、星象風雲喜色和、紫氣關臨天地潤、黃金臺貯俊賢多、

漁陽突騎邯鄲兒、酒酣並轡金鞭垂、意氣卽歸雙闕舞、雄豪復遣五陵知、

李相將軍擁薊門、白頭惟有赤心存、竟能盡說諸侯入、知有從來天子尊、

十二年來多戰場、天威已息陣堂堂、神靈漢代中興王、功業汾陽異姓王、

雜賦類

上卿翁請脩武侯廟遺像缺落時、崔卿權夔

州

木言分數 卷之四 四九 二百五十一  
大賢爲政卽多聞，刺史真符不必分。尚有西郊諸葛廟，卧龍無首對江濱。

戲作寄上漢中王二首

漢中王名瑀時王新誕明珠

雲裏不聞雙鴈過，掌中貪見一珠新。秋風嫋嫋吹江漢，只在他鄉何處人。

謝安舟楫風還起，梁苑池臺雪欲飛。杳杳山東携漢妓，泠泠脩竹待王歸。

答楊梓州

悶到房公池水頭，坐逢楊子鎮東州。却向清溪不相見，回船應載阿戎遊。

李司馬橋了承高使君自成都回

向來江上手紛紛，三日成功事出羣。已傳童子騎青竹，總擬橋東待使君。

書堂飲旣夜復邀李尚書下馬月下賦絕句

李尚書李嗣業也

湖月林風相與清，殘樽下馬復同傾。久拚野鶴如霜鬢，遮莫隣雞下五更。

戲爲六絕

庾信文章老更成，凌雲健筆意縱橫。今人嗤點流傳

賦不覺前賢畏後生

楊王盧駱當時體輕薄爲文哂未休爾曹身與名俱滅不廢江河萬古流

縱使盧王操翰墨劣於漢魏近風騷龍文虎脊皆君馭歷塊過都見爾曹

才力應難跨數公凡今誰是出羣雄或看翡翠蘭苕上未掣鯨魚碧海中

不薄今人愛古人清詞麗句必爲隣竊攀屈宋宜方駕恐與齊梁作後塵

未及前賢更勿疑遙相祖述復先誰別裁僞體親風雅轉益多師是汝師

贈花卿

花卿姓花名敬定劍南節度崔光遠之牙將也時梓州副使段子璋反東川節度李奐敗走光遠率敬定討之子璋旣誅敬定侍功大掠肅宗聞之怒由是不見擢用公作花卿歌蓋痛惜之也

錦城絲管日紛紛半入江風半入雲此曲祇應天上有人間能得幾回聞

江南逢李龜年

大曆三年正月公出峽暮春至江陵逢李  
龜年天寶中明皇命宮中女子數百人爲  
梨園弟子時有馬僊期李龜年賀懷智皆  
洞知律度龜年特承顏遇於東都大起第  
宅僭侈之制逾於公侯後流落江南每遇  
良辰勝景爲人歌數闕座上聞之莫不掩  
泣罷酒

岐王宅裏尋常見崔九堂前幾度聞正是江南好風  
景落花時節又逢君

又於常處乞大邑瓷盃

少府常班公鄉人也爲涪江尉公自註大  
邑在臨邛

大邑燒瓷輕且堅扣如哀玉錦城傳君家白盃勝霜  
雪急送茅齋也可憐

官池春鴈二首

在城都府漢州城西乃房琯所鑿公送嚴  
武至綿州道出漢州故至官池

自古稻梁多不足至今鷓鴣亂爲羣且休悵望着春  
水更恐歸飛隔暮雲

青春欲盡急還鄉紫塞寧論尚有霜翅在雲天終不

遠力微繒繳絕須防

得房公池鵝

房相西亭鵝一羣眠沙泛浦白於雲鳳凰池上應回首為報籠隨王右軍

投簡梓州幕府兼簡常十郎官

郎官唐時多以朝官入州幕府

幕下郎官安穩無從來不奉一行書因知貧病人須棄能使常郎跡也疎

贈李白

秋來相顧尚飄蓬未就丹砂愧葛洪痛飲狂歌空度日飛揚跋扈為誰雄

謝嚴中丞送青城山道士乳酒一罇

青城山在成都府灌縣山有七十二小洞以應七十二候有八大洞以應八節道書以此山為第二洞天乃神仙都會之府釀酒一宿而自來汁曰乳酒

山瓶乳酒下青雲氣味濃香幸見分鳴鞭走送憐漁父洗盞開嘗對馬軍

重贈鄭鍊絕句

前有贈別鄭鍊赴襄陽詩此又重贈之

鄭子將行罷使臣囊無一物獻尊親  
江山路遠羈離日裘馬為誰感激人

號國夫人

楊貴妃有妹三人長封號國其二為韓國  
秦國並承恩出入宮掖

號國夫人承主恩平明上馬入宮門  
却嫌脂粉澆顏色淡掃蛾眉朝至尊

存歿口號二首

公自註四子皆游於藝故甫志之

席謙不見近彈碁畢曜仍傳舊小詩  
玉局他年無限

笑白楊今日幾人悲

其二

鄭公粉繪隨長夜曹霸丹青已白頭  
天下何曾有山水人間不見重驂騑

絕句四首

此草堂中間居自述

堂西長筍別開門塹北行椒却背村  
梅熟許同朱老喫松高擬對阮生論

其二

欲作魚梁雲覆湔因驚四月雨聲寒  
青溪先有蛟龍

窟竹石如山不敢安

其三

兩箇黃鸝鳴翠柳一行白鷺上青天  
窓含西嶺千秋雪門泊東吳萬里船

其四

藥條藥甲潤青青色過棕亭入草亭  
苗滿青山慙取譽根居隙地怯成形

漫成一首

公自雲安發舟下夔州即所見而作

江月去人只數尺風燈照水欲三更  
沙頭宿鷺聯拳

靜船尾跳魚撥刺鳴

三絕句

楸樹馨香倚釣磯斬新花藥未應飛  
不如醉裏風吹盡可忍醒時雨打稀

其二

門外鷓鴣久不來沙前忽見眼相催  
自今已後知人意一日須來一百迴

其三

無數春筍滿林生柴門密掩斷人行  
會須上番看成竹客至從嗔不出迎

解悶十一首

一辭故國十經秋，每見秋瓜憶故丘。今日南湖采蒨蕨，何人爲覓鄭瓜州。

先帝貴妃俱寂寞，荔枝還復入長安。炎方每續朱櫻獻，玉座應悲白露團。

憶過瀘戎摘荔枝，青楓隱映石逶迤。京華應見無顏色，紅顆酸甜只自知。

翠瓜碧李沉玉甃，赤梨浦萄寒露成。可憐先不異枝蔓，此物娟娟長遠生。

側生野岬及江蒲，不熟丹宮滿玉壺。雲壑布衣飴背死，勞生重馬翠眉須。

沈范早知何水部，曹劉不待薛郎中。獨當省署開文苑，兼泛滄浪學釣翁。

李陵蘇武是吾師，孟子論文更不疑。一飯未曾留俗客，數篇今見古人詩。

復憶襄陽孟浩然，清新句句盡堪傳。卽今耆舊無新語，謾釣槎頭縮項鱸。

陶冶性靈存底物，新詩改罷自長吟。孰知一二謝將能事，頗學陰何苦用心。

不見高人王右丞，藍田丘壑蔓寒藤。最傳秀句寰區

浦未絕風流相國能

草閣柴扉星散居浪翻江黑雨飛初山禽引子哺紅  
果溪女得錢留白魚

商胡離別下揚州憶上西陵故驛樓為問淮西米貴  
賤老夫乘興欲東流

時序類

春水生二絕

二月六夜春水生門前小灘渾欲平鷓鴣鷓鴣莫漫  
喜吾與汝曹俱眼明

一夜水高二尺強數日不可更禁當南市津頭有船

賣無錢即買繫籬傍

絕句漫興九首

題名漫興蓋言眼前之景而漫成耳

眼見客愁愁不醒無賴春色到江亭即遣花開深造  
次便覺鶯語太丁寧

手種桃李非無主野老墻低還是家恰是春風相欺  
得夜來吹折數枝花

熟知茅齋絕低小江上燕子故來頻銜泥點污琴書  
內更接飛蟲打著人

二月已破三月來漸老逢春能幾回莫思身外無窮

事且盡生前有限杯

腸斷春江欲盡頭，杖藜徐步立芳州。  
顛狂柳絮隨風舞，輕薄桃花逐水流。

懶慢無堪不出村，呼兒自在掩柴門。  
蒼苔濁酒林中靜，碧水春風野外昏。

糝徑楊花鋪白氈，點溪荷葉疊青錢。  
筍根雉子無人見，沙上鳧雛伴母眠。

舍西柔桑葉可拈，江上細麥復纖纖。  
人生幾何春已夏，不放香醪如蜜甜。

隔戶楊柳弱嫋嫋，恰似十五兒女腰。  
誰謂朝來不作意，狂風挽斷最長條。

### 春和嚴鄭公軍城早秋

秋風嫋嫋動高旌，玉帳分弓射虜營。  
已收滴瀝溽雲間，戍欲奪蓬婆雪外城。

### 中丞嚴公雨中垂寄見憶一絕奉答二絕

雨映行宮辱贈詩，元戎肯赴野人期。  
江邊老病雖無力，強擬晴天理釣絲。

何日雨晴雲出溪，白沙青石洗無泥。  
只須伐竹開荒徑，柱杖穿花聽馬嘶。

### 花木類

江畔獨步尋花七絕句

江上被花惱不徹，無處告訴只顛狂。  
走覓南隣愛酒伴，經旬出飲獨空床。

稠花亂蕊裹江濱，行步欹危實怕春。  
詩酒尚堪驅使在，未須料理白頭人。

江深竹靜雨三家，多是紅花映白花。  
報答春光知有處，應須美酒送生涯。

東望少城花滿烟，百花高樓更可憐。  
誰能載酒開金盞，喚取佳人舞繡筵。

黃師塔前江水東，春光懶困倚微風。  
桃花一簇開無主，可愛深紅愛淺紅。

黃四娘家花滿蹊，千朵萬朵壓枝低。  
留連戲蝶時時舞，自在嬌鶯恰恰啼。

不是愛花即欲死，只恐花盡老相催。  
繁枝容易紛紛落，嫩蕊商量細細開。

從韋二明府續處覓綿竹三數叢

華軒藹藹他年到，綿竹亭亭出縣高。  
江上舍前無此物，幸分蒼翠拂波濤。

憑韋少府班覓松樹子栽

韋少府時爲涪江尉

木言分數 卷之四 五十九 三言  
落落出羣非檉柳，青青不朽豈楊梅。欲存老蓋千年意，爲覓松根數寸栽。

憑何十一少府邕覓橙木數百栽

何邕爲利州綿谷縣尉，公鄉人也。橙木名不材，止可充薪，蜀土所宜木。

草堂塹西無樹林，非子誰復見幽心。飽聞橙木三年大，與致溪邊十畝陰。

請徐卿覓果子栽

草堂少花今欲栽，不問綠李與黃梅。石筍街中却歸去，果園坊裏爲求來。

蕭八明府寔處覓桃栽

奉乞桃栽一百根，春前爲送浣花村。河陽縣裏雖無數，濯錦江邊未滿園。

五言律

紀行類

去蜀

永泰元年四月嚴武薨，五月郭英乂爲成都尹，公與之有舊而志不合，遂去蜀。時自閬回方一歲耳。

五載客蜀郡，一年居梓州。如何關塞阻，轉作瀟湘遊。

萬事已黃髮。殘生隨白鷗。安危大臣在。何必淚長流。

遊子

巴蜀愁誰語。吳門興杳然。九江春草外。三峽暮帆前。  
厭就成都卜。休爲吏部眠。蓬萊如可到。衰白問羣僊。  
行次鹽亭縣聊題四韻奉簡嚴遂州蓬州二  
使君諮議諸昆季

馬首見鹽亭。高山擁縣青。雲溪花淡淡。春郭水泠泠。  
全蜀多名士。嚴家聚德星。長歌意無極。好爲老夫聽。  
自閬州領妻子却赴蜀山行三首

汨汨避羣盜。悠悠經十年。不成向南國。復作遊西川。  
物役水虛照。魂傷山寂然。我生無倚著。盡室畏途邊。

其二

長林偃風色。迴復意猶迷。衫裛翠微潤。馬銜青草嘶。  
棧懸斜避石。橋斷却尋溪。何日兵戈盡。飄飄愧老妻。

其三

行色遞隱見。人烟時有無。僕夫穿竹語。稚子入雲呼。  
轉石驚魑魅。揮弓落狄麕。眞供一笑樂。似欲慰窮途。  
渝州候嚴六侍御不到先下峽

聞道乘驄發。沙邊待至今。不知雲雨散。虛費短長吟。  
山帶烏蠻潤。江連白帝深。船過一柱觀。畱眼共登臨。

船下夔州郭宿雨濕不得上岷別王十二判

官

依沙宿舸船石瀨月娟娟風起春燈亂江鳴夜雨懸  
晨鐘雲外濕勝地石堂烟柔櫓輕鷗外含悽覺汝賢

放船

收帆下急水卷幔逐回灘江市戎戎暗山雲泠泠寒  
荒林無徑入獨鳥恠人看已泊城樓底何曾夜色闌

移居公安山館

南國晝多霧北風天正寒路危行木杪身遠宿雲端  
山鬼吹燈滅厨人語夜闌鷄鳴問前館世亂敢求安

泊岳陽城下

江國踰千里山城僅百層岸風翻夕浪舟雪灑寒燈  
畱滯才難盡艱危氣益增圖南未可料變化有鯤鵬

纜船苦風戲題四韻奉簡鄭十三判官

東岸朔風疾天寒鷓鴣呼漲沙霾草樹舞雲渡江湖  
吹帽時時落維舟日日孤因聲置驛外為覓酒家鑪

宿青草湖

洞庭猶在目青草續為名宿檠依農事郵籤報水程  
寒水爭倚薄雲月透微明湖鴈雙雙起人來故北征

宿白沙驛

水宿仍餘照，人烟復此亭。驛邊沙舊白，湖外草新青。  
萬象皆春氣，孤槎自客星。隨波無限好，的的近南溟。

野望

納納乾坤大，行行郡國遙。雲山兼五嶺，風壤帶三苗。  
野樹侵江澗，春蒲長雪消。扁舟空老去，無補聖明朝。

入喬口

漠漠舊京遠，遲遲歸路賒。殘年傍水國，落日對春華。  
樹蜜早蜂亂，江泥輕燕斜。賈生骨已朽，悽惻近長沙。  
銅官渚守風

不夜楚帆落，避風湘渚間。水耕先浸草，春火更燒山。

早泊雲物晦，逆行波浪慳。飛來雙白鶴，過去香難攀。

發潭州

夜醉長沙酒，曉行湘水春。岼花飛送客，檣燕語留人。  
賈傅才未有，褚公書絕倫。名高前後事，回首一傷神。

雙楓浦

輟棹青楓浦，雙楓舊已摧。自驚衰謝力，不道棟梁材。  
浪足浮紗帽，皮須截錦苔。江邊地有主，暫借上天迴。

舟中

風餐江柳下，雨卧驛樓邊。結纜排魚網，連檣並米船。  
今朝雲細薄，昨夜月清圓。飄泊南庭老，只應學水仙。

南征

春岸桃花水雲帆楓樹林  
儉生長避地適遠更霑襟  
老病南征日君恩北望心  
百年歌自苦未見有知音

久客

羈旅知交態淹留見俗情  
衰顏聊自哂小吏最相輕  
去國哀王粲傷時哭賈生  
狐狸何足道豺虎正縱橫

遠遊

江濶浮高棟雲長出斷山  
塵沙連越雋風雨暗荆蠻  
鴈矯銜蘆內猿啼失木間  
敝裘蘇季子歷國未知還

客夜

客睡何曾著秋天不肯明  
入簾殘月影高枕遠江聲  
計拙無衣食途窮仗友生  
老妻書數紙應悉未歸情

客亭

秋窓猶曙色木落更天風  
日出寒山外江流宿霧中  
聖朝無棄物老病已成翁  
多少殘生事飄零任轉蓬

晚行口號

公時家在鄜州有墨制許往省視  
八月自

鳳翔還鄜州

三川不可到歸路晚山稠  
落鴈浮寒水饑鳥集成樓  
市朝今日異喪亂幾時休  
遠愧梁江撝還家尚黑頭

地隅

地一隅謂公自處蜀之一方也

江漢山重阻風雲地一隅年年非故物處處是窮途  
喪亂秦公子悲涼楚大夫平生心已折行路日荒蕪

過洞庭湖

洪王甫云此詩廼人得之於江心一小石

刻

鮫室圍青草龍堆隱白沙護堤盤古木迎棹舞神鴉  
破浪南風正回檣畏日斜湖光與天遠直欲泛僊槎

述懷類

官定後戲贈

公進三大禮賦上使待制集賢院令宰相

陳希烈試文章為希烈所忌試後止送有

司參列選序擢河西尉不拜改授右衛率

府參軍

不作河西尉淒涼為折腰老夫怕趨走率府且逍遙  
耽酒須微祿狂歌託聖朝故山歸興盡回首向風颺

至德二載甫自京金光門出問道歸鳳翔乾

元初從左拾遺移華州椽與親故別因出此

門有悲往事

此道昔歸順西郊胡正煩至今猶破膽應有未招寬  
近侍歸京邑移官豈至尊無才日衰老駐馬望千門

寓目

左傳僖公二十八年子玉請戰曰得臣與  
寓目焉寓目猶寄目矚目也

一縣蒲萄熟秋山苜蓿多關雲常帶雨塞水不成河  
羌女輕烽燧胡兒制駱駝自傷遲暮眼喪亂飽經過

空囊

公客秦州負薪採橡栗以自給羈旅之窮  
於是為甚

翠柏苦猶食明霞朝可食世人共鹵莽吾道屬艱難  
不爨井晨凍無衣床夜寒囊空恐羞澁留得一錢看

遣懷

愁眼看霜露寒城菊自花天風隨斷柳客淚墮清笳  
水靜樓陰直山昏塞日斜夜來歸鳥盡啼殺後棲鴉

遣意二首

轉枝黃鳥近泛渚白鷗輕一徑野花落孤村春水生  
衰年催釀黍細雨更移橙漸喜交游絕幽居不用名

其二

簷影微微落津流脉脉斜野船明細火宿鴈聚圓沙

雲掩初弦月，香傳小樹花。隣人有美酒，稚子夜能賒。  
獨立

空外一鷺鳥，河間雙白鷗。飄飄搏擊便，容易往來遊。  
草露亦多濕，蛛絲仍未收。天機近人事，獨立萬端憂。

遠遊

賤子何人記，迷方著處家。竹風連野色，江沫擁春沙。  
種藥扶衰病，吟詩解嘆嗟。似聞胡騎走，失喜聞京華。

徐步

整履步青蕪，荒庭日欲曛。芹泥隨燕紫，花蕊上蜂鬚。  
把酒從永濕，吟詩信杖扶。敢論才見忌，實有醉如泥。

愁坐

高齋常見野，愁坐更臨門。十月山寒重，孤城水氣昏。  
葭萌氏種迥，左檐犬戎屯。終日憂奔走，歸期未敢論。

雲山

京洛雲山外，音書靜不來。神交作賦客，力盡望鄉臺。  
衰疾江邊卧，親朋日暮迴。白鷗元水宿，何事有餘哀。

倚杖

公自註鹽亭縣作

看花雖郭外，倚杖卽溪邊。山縣早休市，江橋春聚船。  
狎鷗輕白浪，歸鴈喜青天。物色兼生意，淒涼憶去年。

屏跡二首

用拙存吾道，幽居近物情。  
桑林深雨露，燕雀半生成。  
村鼓時時急，漁舟箇箇輕。  
杖藜從白首，心跡喜雙清。

其二

晚起家何事，無營地轉幽。  
竹光園野色，含影漾江流。  
失學從兒懶，長貧任婦愁。  
百年渾得醉，一月不梳頭。

歸來

客裏有所適，歸來知路難。  
開門野鼠走，散帙壁魚乾。  
洗杓開新醞，低頭拭小冠。  
憑誰給麴蘖，細酌老江干。

散愁二首

又客宜旋旆，興王未息戈。  
蜀星陰見少，江雨夜聞多。  
百萬轉深入，寰區望匪他。  
司徒下燕趙，收取舊山河。

其二

聞道并州鎮，尚書訓士齊。  
幾時通薊北，當日報關西。  
戀闕丹心破，霑衣皓首啼。  
老魂招不得，歸路恐長迷。

旅夜書懷

永泰元年去成都舟下渝忠時作

細草微風岸，危檣獨夜舟。  
星垂平野濶，月湧大江流。  
名豈文章著，官應老病休。  
飄飄何所似，天地一浮鷗。

歸

束帶還騎馬，東西却渡船。  
林中才有地，峽外絕無天。

虛白高人靜，喧卑俗累牽。他鄉閱遲暮，不敢廢詩篇。

客舊館

陳迹隨人事，初秋別此亭。重來梨葉赤，依舊竹林青。  
風幔何時卷，寒砧昨夜聲。無由出江漢，愁緒日冥冥。

遣愁

養拙蓬爲戶，茫茫何所開。江通神女館，地隔望鄉臺。  
漸惜容顏老，無由弟妹來。兵戈與人事，迴首一悲哀。

憶鄭南玘

玘玉色言石似玉也。鄭南當是華州鄭縣之南。

鄭南伏毒寺瀟洒到天心，石影銜珠閣，泉聲帶玉琴。  
風杉曾曙倚，雲嶠憶春臨。萬里蒼茫水，龍蛇只自深。

懷灞上游

悵望東陵道，平生灞上游。春濃停野騎，夜宿敞雲樓。  
離別人誰在，經過老自休。眼前今古意，江漢一歸舟。

江上

江上日多雨，蕭蕭荆楚秋。高風下木葉，永夜攬貂裘。  
勲業頻看鏡，行藏獨倚樓。時危思報主，衰謝不能休。

江漢

江漢思歸客，乾坤一腐儒。片雲天共遠，永夜月同孤。

木言夕數  
卷之四  
二十九  
三百九十三  
落日心猶壯，秋風病欲蘇。古來存老馬，不必取長途。

垂白

言白髮下垂也

垂白馮唐老，清秋宋玉悲。江喧長少睡，樓迥獨移時。多難身何補，無家病不辭。甘從千日醉，未許七哀詩。

秋峽

江濤萬古峽，肺氣久衰翁。不寐防巴虎，全生狎楚童。衣裳垂素髮，門巷落丹楓。常惟商山老，兼存翊贊功。

獨坐二首

竟日雨冥冥，雙崖洗更清。水花寒落岬，山鳥暮過庭。

煖老須燕玉，充饑憶楚萍。胡笳在樓上，哀怨不堪聽。

其二

白狗斜臨北，黃牛更在東。峽雲常照夜，江日會兼風。曬藥安垂老，應門試小童。亦知行不逮，苦恨耳多聾。

覽鏡呈柏中丞

中丞卽柏貞節

渭水流關內，終南在日邊。膽銷豺虎窟，淚入犬羊天。起晚堪從事，行遲更覺仙。鏡中衰謝色，萬一故人憐。

東屯北嶮

盜賊浮生困，誅求異俗貧。空村惟見鳥，落日未逢人。

步壑風吹面，看松露滴身。遠山回白首，戰地有黃塵。  
有歎

壯心久零落，白首寄人間。天下兵常鬪，江東客未還。  
窮猿號雨雪，老馬望關山。武德開元際，蒼生豈重攀。  
悶

瘴癘浮三蜀，風雲暗百蠻。卷簾唯白水，隱几亦青山。  
猿捷長難見，鷗輕故不還。無錢從滯客，有鏡巧催顏。

獨坐

悲秋回白首，倚杖背孤城。江歛洲渚出，天虛風物清。  
滄溟服衰謝，朱紱負平生。仰羨黃昏鳥，投林羽翮輕。

戲作俳諧體遣悶二首

俳音排，謂俳優詼諧也。

異俗吁可恠，斯人難並居。家家養烏鬼，頓頓食黃魚。  
舊識難為態，新知已暗疎。治生且耕鑿，只有不關渠。

其二

西歷青羌坂，南留白帝城。於菟侵客恨，拒救作人情。  
瓦卜傳神女，畬田費火聲。是非何處定，高枕笑浮生。

遣憂

亂離知又甚，消息苦難真。受諫無今日，臨危憶古人。  
紛紛乘白馬，攘攘著黃巾。隋氏留宮室，焚燒何太頻。

長吟

江渚翻鷗戲官橋帶柳陰江飛競渡日草見踏青心  
已撥形骸累真為爛熳深賦詩新句穩不覺自長吟  
樓上

天地空搔首頻抽白玉簪皇輿三極北身事五湖南  
戀闕勞肝肺論材愧杞柁亂離難自救終是老湘潭  
耳聾

生年鶻冠子歎世鹿皮翁眼復幾時暗耳從前月聾  
猿鳴秋淚缺雀噪晚愁空黃落驚山樹呼兒問朔風  
老病

老病巫山裏稽留楚客中藥殘他日裏花發去年叢  
夜足霑沙雨春多逆水風合分雙賜筆猶作一飄蓬  
公安縣懷古

野曠呂蒙營江深劉備城寒天催日短風浪與雲平  
灑落君臣契飛騰戰伐名維舟倚前浦長嘯一含情  
過宋員外之問舊莊

宋公舊池館零落首陽阿枉道祇從入吟詩許更過  
淹留問耆老寂寞向山河更識將軍樹悲風日暮多  
石鏡

成都記武都山精化為女子蜀王開明納

爲妃無幾物故王哀之取武都山土築爲  
塚蓋地數畝以石鏡表其門鏡厚五寸徑  
五尺瑩徹如鏡

蜀王將此鏡送死置空山冥冥憐香骨提携近玉顏  
衆妃無復歎千騎亦虛還獨有傷心石埋輪月宇間

琴臺

成都府有琴臺卽相如與文君貰酒處

茂陵多病後尚愛卓文君酒肆人間世琴臺日暮雲  
野花留寶屐蔓草見羅裙歸鳳求凰意寥寥不復聞

時事類

北風

北風破南極朱鳳日威垂洞庭秋欲雪鴻鴈將安歸  
十年殺氣盛六合人烟稀吾慕漢初老時清猶茹芝

巴山

巴山遇中使云是峽城來盜賊還奔突乘輿恐未迴  
天寒召伯樹地潤望仙臺狼狽風塵裏羣臣安在哉  
喜達行在所三首

西憶岐陽信無人遂却迴眼穿當落日心死著寒灰  
霧樹行相引蓮峰望或開所親驚老瘦辛苦賊中來

其二

愁思胡笳夕，淒涼漢苑春。生還今日事，間道暫時人。  
司隸章初覩，南陽氣已新。喜心翻倒極，嗚咽淚沾巾。

其三

死去憑誰報，歸來始自憐。猶瞻太白雪，喜遇武功天。  
影靜千官裏，心蘇七校前。今朝漢社稷，新數中興年。

收京三首

仙仗離丹極，妖心帶玉除。須為下殿走，不可好樓居。  
暫屈汾陽駕，聊飛燕將書。依然七廟略，更與萬方初。

其二

生意甘衰白，天涯正寂寥。忽聞哀痛詔，又下聖明朝。

羽翼懷商老，文思憶帝堯。叨逢罪已日，霑洒望青霄。

其三

汗馬收官闕，春城鏜賊壕。賞應歌杖杜，歸及薦櫻桃。  
雜虜橫戈數，功臣甲第高。萬方頻送喜，無乃聖躬勞。

收京

廣德二年十月癸巳，郭子儀復京師十二  
月，代宗車駕至自陝州。

復道收京邑，兼聞殺犬戎。衣冠却扈從，車馬已還宮。  
剋復誠如此，扶持在數公。莫令回首地，慟哭起悲風。

遣憤

郭子儀使白元光與回紇將藥葛羅合兵  
 追吐蕃大破之於是回紇等入見贈資繒  
 帛十萬匹府藏空竭稅百官俸以給之此  
 為可憤也

聞道花門將論功未盡歸自從收帝里誰復總戎機  
 蜂虿終懷毒雷霆可震威莫令鞭血地再濕漢臣衣

西山三首

按史明皇還蜀後復分東西兩川為兩節  
 度西山列防秋三戍民罷于役高適當上  
 疏論不聽

夷界荒山頂蕃州積雪邊築城依白帝輸粟上青天  
 蜀將分旗鼓羌兵助鎧鋌西南背和好殺氣日相纏

其二

辛苦三城戍長防萬里秋烟塵侵火井雨雪閉松州  
 風動將軍幕天寒使者裘漫山賊營壘迴首得無憂

其三

子弟猶深入關城未解圍蠶崖鐵馬瘦灌口米船稀  
 辯士安邊策元戎決勝威今朝烏鵲喜欲報凱歌歸

警急

漢書邊防備警急時高適領西川節度使

是年吐蕃寇隴右適出兵南鄙以牽制之  
既無功遂立松維保三州

才名舊楚將妙略總兵機玉壘雖傳檄松州會解圍  
和親知計拙公主漫無歸青海今誰得西戎實飽飛

### 王命

漢北豺狼滿巴西道路難血埋諸將甲骨斷使臣鞍  
牢落新燒棧蒼茫舊築壇深懷喻蜀意慟哭望王官

### 征夫

警急王命征夫三首皆為高適而作吐蕃  
入寇時適在蜀調征夫防守卒陷松維等

州故首篇有才名妙略之稱而其下皆敗  
北之事則其機略可知蓋諷之之詞

十室幾人在千山空自多路衢唯見哭城市不聞歌  
漂梗無安地銜枚有荷戈官軍未通蜀吾道竟如何

### 有感五首

將帥蒙恩澤兵戈有歲年至今勞聖主何以報皇天  
白骨新交戰雲臺舊拓邊乘槎斷消息無處覓張騫

### 其二

幽薊餘蛇豕乾坤尚虎狼諸侯春不貢使者日相望  
慎勿吞青海無勞問越裳大君先息戰歸馬華山陽

其三

洛下舟車入天中，貢賦均日聞。紅粟腐寒待翠華，春莫取金湯固。長令宇宙新，不過行儉德。賊盜本王臣，

其四

丹桂風霜急，青梧日夜凋。由來強幹地，未有不臣朝。受鉞親賢往，卑宮制詔遙。終依古封建，豈獨聽簫韶。

其五

胡滅人還亂，兵殘將自疑。登壇名絕假，報主爾何遲。領郡輒無色，之官皆有詞。願聞哀痛詔，端拱問瘡痍。

卽事

聞道花門破，和親事却非。人憐漢公主，生得渡河歸。秋思拋雲髻，腰支賸寶衣。羣凶猶索戰，迴首意多違。

歷歷

歷歷開元事，分明在眼前。無端賊盜起，忽已歲時遷。巫峽西江外，秦城北斗邊。為郎從白首，卧病數秋天。

洛陽

此詩非言洛陽事而題曰洛陽，蓋取首二字耳。

洛陽昔陷沒，胡馬犯潼關。天子初愁思，都人慘別顏。清笳去宮闕，翠蓋出關山。故老仍流涕，龍髯幸再攀。

驪山

驪山絕望幸花萼罷登臨地下無朝燭人間有賜金  
鼎湖龍去遠銀海鴈飛深萬歲蓬萊日長懸舊羽林

提封

謂提畫封疆

提封漢天下萬國尚同心借問懸車守何如儉德臨  
時徵俊乂入莫慮犬羊侵願戒兵猶火恩加四海深

軍旅類

陪栢中丞觀宴將士二首

中丞名貞節時為夔州都督公嘗為作謝

上表

極樂三軍士誰知百戰場無私齊綺饌久坐密金章  
醉客霑鸚鵡佳人指鳳凰幾時來翠節特地引紅粧

其二

繡段裝簷額金花貼鼓腰一夫先舞劍百戲後歌鐮  
江樹城孤遠雲臺使寂寥漢朝頻選將應拜霍嫖姚

觀兵

乾元元年八月命朔方節度郭子儀會九  
節度師討安慶緒於鄴城至是二年三月  
鄴城師潰此詩當作於未潰之前也

北庭送壯士、貔虎數尤多、精銳舊無敵、邊隅今若何、  
妖氛擁白馬、元帥待彫戈、莫守鄴城下、斬鯨遼海波、  
觀安西兵過赴關中待命二首

四鎮富精銳、摧鋒皆絕倫、還聞獻士卒、足以靖風塵、  
老馬夜知道、蒼鷹饑著人、臨危經久戰、用意始知神、  
其二

奇兵不在衆、萬馬救中原、談笑無河北、心肝奉至尊、  
孤雲隨殺氣、飛鳥避轅門、竟日留歡樂、城池未覺喧、

夕烽

夕烽來不近、每日報平安、塞上傳光小、雲邊落點殘、  
照秦通警急、過隴自艱難、聞道蓬萊殿、千門立馬看、

宮室類

洞房

洞房環珮冷、玉殿起秋風、秦地應新月、龍池滿舊宮、  
繫舟今夜遠、清漏往時同、萬里黃山北、園陵白露中、

宿昔

宿昔青門裏、蓬萊仗數移、花驕迎雜樹、龍喜出平池、  
落日留王母、微風倚少兒、宮中行樂秘、少有外人知、  
能盡

能盡毛延壽、投壺郭舍人、每蒙天一笑、復似物皆春、

政化平如水、皇恩斷若神、時時用抵戲、亦未雜風塵

鬪雞

鬪雞初賜錦、舞馬既登牀、簾下宮人出、樓前御柳長、  
仙遊終一閱、女樂久無香、寂寞驪山道、清秋草木黃

春宿左省

宣政殿西有門下省、公為左拾遺、屬門下省、而門下省在東、故曰左省、亦曰左掖

花隱掖垣暮、啾啾棲鳥過、星臨萬戶動、月傍九霄多、  
不寢聽金鑰、因風想玉珂、明朝有封事、數問夜如何

晚出左掖

晝刻傳呼淺、春旗簇仗齊、退朝花底散、歸院柳邊迷、  
樓雪融城濕、宮雲去殿低、避人焚諫草、騎馬欲雞栖

禹廟

成都府廣柔廢縣、有石紐鄉、禹所生地也、郡人以禹六月六日生辰歲、以此日致祭

禹廟空山裏、秋風落日斜、荒庭垂橘柚、古屋畫龍蛇、  
雲氣生虛壁、江聲走白沙、早知乘四載、疏鑿控三巴

湘夫人祠

湘夫人、舜二妃娥皇女英

蕭蕭湘妃廟、空墻碧水春、蟲書玉佩蘚、燕舞翠幃塵

木言夕數  
卷之四  
三〇六同

晚泊登汀樹微馨借渚蘋蒼梧恨不淺染淚在叢筠  
祠南夕望

百丈牽江色孤舟泛日斜興來猶杖屨目斷更雲沙  
山鬼迷春竹湘娥倚暮花湖南清絕地萬古一長嗟  
一室

一室他鄉遠空林暮景懸正愁聞塞笛獨立見江船  
巴蜀來多病荆蠻去幾年應同王粲宅畱井峴山前

田舍

田舍清江曲柴門古道傍草深迷市井地僻嬾衣裳  
檉柳枝枝弱枇杷樹樹香鷓鴣西日照曬翅滿漁梁

爲農

錦里烟塵外江村八九家圓荷浮小葉細麥落輕花  
卜宅從茲老爲農去國賒遠慚勾漏令不得問丹砂

西郊

時出碧雞坊西郊近草堂市橋官柳細江路野梅香  
傍架齊書帙看題減藥囊無人覺來往疎懶意何長

村夜

蕭蕭風色暮江頭人不行村春雨外急鄰火夜深明  
胡羯何多難漁樵寄此生中原有兄翁萬里正含情

草堂卽事

木言分集 卷之四 十一  
荒村建子月，獨樹老夫家。雪裏江船度，風前徑竹斜。  
寒魚依密藻，宿鷺起圓沙。蜀酒禁愁得，無錢何處賒。

水檻遣心二首

去郭軒楹敞，無村眺望賒。澄江平少岸，幽樹晚多花。  
細雨魚兒出，微風燕子斜。城中十萬戶，此地兩三家。

其二

蜀天常夜雨，江檻已朝晴。葉潤林塘密，衣乾枕席清。  
不堪祇老病，何得尚浮名。淺把涓涓酒，深憑送此生。

舍弟占歸草堂檢校聊示此詩

檢校即收拾之意

久客應吾道，相隨獨爾來。詵知江路近，頻爲草堂迴。  
鵝鴨宜長數，柴荆莫浪開。東林竹影薄，臘月更須栽。

懷錦水居二首

軍旅西征僻，風塵戰伐多。猶聞蜀父老，不忘舜謳歌。  
天險終難立，柴門豈重過。朝朝巫峽水，遠逗錦江波。

其二

萬里橋西宅，百花潭北莊。層軒皆面水，老樹飽經霜。  
雪嶺界天白，錦城曠日黃。惜哉形勝地，回首一茫茫。

題忠州龍興寺所居院壁

忠州三峽內，井邑聚雲根。小市常爭米，孤城早閉門。

空看過客淚，莫覓主人恩。淹泊仍愁虎，深居賴獨園。

移居夔州郡

伏枕雲安縣，遷居白帝城。春知催柳別，江與放船清。  
農事聞人說，山光見鳥情。禹功饒斷石，且就土微平。

入宅三首

奔峭背赤甲，斷崖當白鹽。客居媿遷次，春色漸多添。  
花亞欲移行，鳥窺新捲簾。衰年不敢恨，勝槩欲相兼。

其二

亂後居難定，春歸客未還。水生魚復浦，雲暖麝香山。  
半頂梳頭白，過眉拄杖斑。相看多使者，一一問南關。

其二

宋玉歸州宅，雲通白帝城。吾人淹老病，旅食豈才名。  
峽口風常急，江流氣不平。只應與兒子，飄轉任浮生。

卜居

歸羨遼東鶴，吟同楚執珪。未成遊碧海，著處覓丹梯。  
雲嶂寬江北，春耕破瀼西。桃紅客若至，定似昔人迷。  
暮春題瀼西新賃草屋五首

久嗟三峽客，再與暮春期。百舌欲無語，繁花能幾時。  
谷虛雲氣薄，波亂日華遲。戰伐何由定，哀傷不在茲。

其二

別作北

此郊千樹橘不見比封君養拙干戈際今生麋鹿羣  
畏人江北草旅食灤西雲萬里巴渝曲三年實飽聞

其三

綵雲陰復白錦樹曉來青身世雙蓬鬢乾坤一草亭  
哀歌時自短醉舞爲誰醒細雨荷鋤立江猿吟翠屏

其四

壯年學書劍他日委泥沙事主非無祿浮生卽有涯  
高齋依藥餌絕域改春華喪亂丹心破王臣未一家

其五

欲陳濟世策已老尚書郎不息豺虎鬪空慚鷓鴣鷺行

時危人事急風逆羽毛傷落日悲江漢中宵淚滿牀

自灤西荆扉且移居東屯茅屋四首

白鹽危嶠北赤甲古城東平地一川穩高山四面同  
烟霜淒野日秔稻熟天風人事傷蓬轉吾將守桂叢

其二

東屯復灤西一種任青溪來往兼茅屋淹留爲稻畦  
市喧宜近利林僻此無蹊若訪衰翁語須令賸客迷

其三

道北馮都使高齋見一川子能渠細石吾亦沼清泉  
枕帶還相似柴荆卽有焉斫畚應費日解纜不知年

其四

牢落西江外，參差北戶間。久遊巴子國，卧病楚人山。  
幽獨移佳境，清深隔遠關。寒空見鵝鷺，回首想朝班。  
從驛次草堂復至東屯二首

大曆二年秋，公自東屯又歸瀼西，此復至東屯，蓋冬初也。

峽裏歸田客，江邊借馬騎。非尋戴安道，似向習家池。  
山險風煙合，天寒橘柚垂。築場看斂積，一學楚人爲。

其二

短景難高卧，衰年強此身。山家蒸栗暖，野飯射麋新。  
世路知交薄，門庭畏客頻。牧童斯在眼，田父實爲鄰。  
暫往白帝復還東屯

復作歸田去，猶殘穫稻功。築場憐穴蟻，拾穗許村童。  
落杵光輝白，除芒子粒紅。加食可扶老，食廩慰飄蓬。  
憑孟倉曹將書覓土婁舊莊

土婁地名，在今河南府洛陽縣有杜預等墓在焉。公以乾元戊戌冬往洛陽，明年春晚歸華州，至大曆二年丁未爲十年在夔

州

平居喪亂後，不到洛陽岑。爲歷雲山間，無辭荆棘深。

北風黃葉下，南浦白頭吟。十載江湖客，茫茫遲暮心。  
過南隣朱山人水亭

南隣卽前者錦里先生

相近竹參差，相過人不知。幽花歌滿樹，小水細通池。  
歸客村非遠，殘尊度更移。看君多道氣，從此數追隨。

北鄰

此指草堂之鄰

明府豈辭滿，藏身方告勞。青錢買野竹，白幘岸江臯。  
愛酒晉山簡，能詩何水曹。時來訪老疾，步履到蓬蒿。

題柏大兄弟山居屋壁二首

柏大當是柏中丞貞節之子姪

叔父朱門貴，郎君玉樹高山居。精典籍，文雅涉風騷。  
江漢終吾老，雲林得爾曹。哀絃繞白雪，未與俗人操。

其二

野屋流寒水，山籬帶白雲。靜應連虎穴，喧已去人羣。  
筆架霑窓雨，書籤映隙曛。蕭蕭千里馬，箇箇五花文。

題鄴原郭三十二明府茆屋壁

江頭且繫船，爲爾獨相憐。雲散灌壇雨，春青彭澤田。  
頻驚適小國，一擬問高天。別後巴東路，逢人問幾賢。

李監宅二首

尚覺王孫貴，豪家意頗濃。屏開金孔雀，褥隱繡芙蓉。  
且食雙魚美，誰看異味重。門闌多喜色，女婿近乘龍。

其二

華館春風起，高城烟霧開。雜花分戶映，嬌燕入簾迴。  
一見能傾座，虛懷只愛才。鹽官雖絆驥，名是漢庭來。

茅堂檢校收稻二首

香稻三秋末，平田百畝間。喜無多屋宇，幸不礙雲山。  
御袂侵寒氣，嘗新破旅顏。紅鮮終日有，玉粒未吾慳。

其二

稻米炊能白，秋葵煮復新。誰云滑易飽，老藉軟俱勻。  
種幸房州熟，苗同伊闕春。無勞映渠盃，自有色如銀。

刈稻了詠懷

稻穫空雲水，川亭對石門。寒風疎草木，旭日散鷄豚。  
野哭初聞戰，樵歌稍出村。無家問消息，作客信乾坤。

皇族類

衡州送李大夫七丈勉赴廣州

斧鉞下青冥，樓船過洞庭。北風隨爽氣，南斗避文星。  
日月籠中鳥，乾坤水上萍。王孫丈人行，垂老見飄零。

送李卿擘

按宗室世系大鄭王房淮安忠公瑋之子

終刑部侍郎

王子思歸日，長安已亂兵。  
霑衣問行在，走馬向承明。  
暮景巴蜀僻，春風江漢清。  
晉山雖自棄，魏闕尚含情。

宗族類

遺興

干戈猶未定，弟妹各何之。  
拭淚霑襟血，梳頭滿面絲。  
地卑荒野大，天遠暮江遲。  
衰病那能久，應無見汝期。

憶弟二首

公自註時歸南陸渾庄

喪亂聞吾弟，饑寒傍濟州。  
人稀書不到，兵在見何由。

憶昨狂催走，無時病去憂。  
卽今千種恨，誰共水東流。

其二

且喜河南定，不問鄴城圍。  
百戰今誰在，三年望汝歸。  
故園花自發，春日鳥還飛。  
斷絕人烟久，東西消息稀。

得舍弟消息

亂後誰歸得，他鄉勝故鄉。  
直爲心厄苦，久念與存亡。  
汝書猶在壁，汝妾已辭房。  
舊犬知愁恨，垂頭傍我床。

得舍弟消息二首

近有平陰信，遙憐舍弟存。  
側身千里道，寄食一家村。  
烽舉新酣戰，啼誰舊血痕。  
不知臨老日，招得幾時魂。

其二

汝懦歸無計，吾衰往未期。浪傳烏鵲喜，深負鶴鴒詩。  
生理何顏面，憂端且歲時。兩京三十口，雖在命如絲。  
月夜憶舍弟

戍鼓斷行人，秋邊一鴈聲。露從今夜白，月是故鄉明。  
有弟皆分散，無家問死生。寄書長不達，况乃未休兵。  
送舍弟穎赴齊州三首

岷嶺南蠻北，徐關東海西。此行何日到，送汝萬行啼。  
絕域惟高枕，清風獨杖藜。時危暫相見，衰白意都迷。  
其二

風塵暗不開，汝去幾時來。兄弟分離苦，形容老病催。  
江通一柱觀，日落望鄉臺。客意長東北，齊州安在哉。  
其三

諸姑今海畔，兩弟亦山東。去傍干戈覓，來看道路通。  
短衣防戰地，匹馬逐秋風。莫作俱流落，長瞻碣石鴻。  
得舍弟觀書自中都，以達江陵。今茲暮春月，未合行李到夔州。悲喜相兼，團圓可待。賦詩  
卽事情見乎辭。

爾到江陵府，何時到峽州。亂離生有別，聚集病應瘳。  
颯颯開啼眼，朝朝上水樓。老身須付託，白骨更何憂。

喜觀即到復題短篇二首

巫峽千山暗，終南萬里春。病中吾見弟，書到汝為人。  
意答兒童問，來經戰伐新。泊船悲喜後，欵欵話歸秦。

其二

待爾嗔烏鵲，拋書示鶴鴒。枝間喜不去，原上急曾經。  
江閣嫌津柳，風帆數驛亭。應論十年事，愁絕始星星。

舍弟觀歸藍田迎新婦送示二首

汝去迎妻子，高秋念却迴。即今螢已亂，如與鴈同來。  
東望西江永，南游北戶開。卜居期靜處，會有故人杯。

其二

楚塞難為路，藍田莫滯留。衣裳判白露，鞍馬信清秋。  
滿峽重江水，開帆八月舟。此時同一醉，應在仲宣樓。

乘雨入行軍六弟宅

時杜位為江陵行軍司馬，唐志元帥府節

度使大都督府，皆有行軍司馬掌弼戎政。

曙角凌雲罷，春城帶雨長。水花分塹弱，巢燕得泥忙。  
令弟雄軍佐，凡材汚省郎。萍飄忍流涕，衰颯近中堂。

送十五弟侍御使蜀

喜弟文章進，添余別興牽。數盃巫峽酒，百丈內江船。  
未息豺狼鬪，空催犬馬年。歸朝多便道，搏擊望秋天。

憶幼子

幼子名宗武小字驥子

驥子春猶隔鶯歌暖正繁別離驚節改聽慧與誰論  
澗水空山道柴門老樹枝憶渠愁只睡炙背俯晴軒

宴忠州使君姪宅

出守吾家姪殊方此日歡自須遊阮舍不足怕湖灘  
樂助長歌送杯饒旅思寬昔曾如意舞牽率強為看

示姪佐

佐草堂在東柯谷按世系表佐是襄陽房  
殿中侍御史晞之子也谷在秦州

多病秋風落君來慰眼前前自聞茅屋趣只想竹林眠  
滿谷山雲起侵籬澗水懸嗣宗諸子姪早覺仲容賢

吾宗

公自註衛倉曹崇簡鶴曰按世系表崇簡  
出襄陽房為益州司馬參軍

吾宗老孫子質朴古人風耕鑿安時論衣冠與世同  
在家常早起憂國願年豐語及君臣際經書滿腹中

外族類

閬州奉送二十四舅使自京赴任青城

聞道王喬為名因太史傳如何碧鷄使把詔紫微天

秦嶺愁回馬，涪江醉泛船。青城漫汗雜，吾舅意凄然。  
奉送崔都水翁下峽

無數涪江筏，鳴橈總發時。別離終不久，宗族忍相遺。  
白狗黃牛峽，朝雲暮雨祠。所過憑訊問，到日自題詩。  
巫峽弊廬奉贈侍御四舅別之澧朗

江城秋日落，山鬼閉門中。行李淹吾舅，誅茅問老翁。  
赤眉猶世亂，青眼只途窮。傳語桃源客，人今出處同。  
奉送十七舅下邵桂

絕域三冬暮，浮生一病身。感深辭舅氏，別後見何人。  
縹緲蒼梧野，推遷孟母隣。昏昏阻雲水，側望苦傷神。

寺觀類

隱逸附

宿贊公房

贊公京師大雲寺主，與宰相房琯遊從，及  
房以小罪罷相，公上疏爭之，亦幾獲罪，由  
此流落，贊亦房相之客，因被遷謫，故公與  
之款曲如此。

杖錫何來此，秋風已颯然。雨荒深院菊，霜倒半池蓮。  
放逐寧違性，虛空不離禪。相逢成夜宿，龐月向人圓。  
題玄武禪師屋壁

何年顧虎頭，滿壁畫滄洲。赤日石林氣，青天江海流。

錫飛常近鶴，杯渡不驚鷗。似得廬山路，真隨惠遠遊。  
謁真諦寺禪師

蘭若山高處，煙霞障幾重。凍泉依細石，晴雪落長松。  
問法看詩矣，觀身向酒慵。未能割妻子，卜宅近前峰。  
已上人茅齋

僧名齊已善詩知名於唐

已公茅屋下，可以賦新詩。枕簟入林僻，茶瓜留客遲。  
江蓮搖白羽，天棘蔓青絲。空忝許詢輩，難酬支遁詞。  
陪李梓州王閬州蘇遂州李果州四使君登  
惠義寺惠義寺在梓州郪縣壯

春日無人境，虛空不住天。鶯花隨世界，樓閣倚山巔。  
遲暮身何得，登臨意惘然。誰能解金印，瀟洒共安禪。  
和裴迪登新津寺寄王侍御

裴迪洗馬裴天常之後侍御名縉王維之弟

何恨倚山木，吟詩秋葉黃。蟬聲集古寺，鳥影度寒塘。  
風物悲游子，登臨憶侍郎。老夫貪佛日，隨意宿僧房。  
遊脩覺寺

在成都府新津縣東南五里脩覺山中

野寺江天豁，山扉花竹幽。詩應有神助，吾得及春遊。

徑石相縈帶，川雲自去留。禪枝宿衆鳥，漂轉暮歸愁。

後遊

寺憶曾遊處，橋憐再渡時。江山如有待，花柳更無私。  
野潤烟光薄，沙暄日色遲。客愁全爲減，捨此復何之。

上牛頭寺

牛頭山在梓州郫縣西南，形似牛頭，四面孤絕，俯臨州郭。上有長樂寺，樓閣煙花爲

一方之勝槩

青山意不盡，袞袞上牛頭。無復能拘礙，真成浪出遊。  
花濃春寺靜，竹細野池幽。何處鶯聲切，移時獨未休。

望牛頭寺

牛頭見鶴林，梯逕繞幽深。春色浮山外，天河宿殿陰。  
傳燈無白日，布地有黃金。休作狂歌老，回看不住心。

上兜率寺

兜率知名寺，真如會法堂。江山有巴蜀，棟宇自齊梁。  
庾信哀雖久，何顛好不忘。白牛車遠近，且欲上慈航。

望兜率寺

樹密當山徑，江深隔寺門。霏霏雲氣重，閃閃浪花翻。  
不復知天大，空餘見佛尊。時應清盥罷，隨喜給孤園。

山寺

隴城縣東柯谷之南麥積山有瑞應寺山形如積麥佛龕剝石閣道縈旋上下千餘尺山下水縱橫可涉東柯僧院甚有幽致高檻可以眺遠虛窓可以來風遊人如市野寺殘僧少山園細路高麝香眠石竹鸚鵡啄金桃亂水通人過懸崖置屋牢上方重閣晚百里見纖毫

玉臺觀

此亦滕王所造滕王唐高祖子元嬰建滕王閣於江西南昌府

浩劫因王造平臺訪古遊綵雲蕭史駐文字魯恭留

宮闕通羣帝乾坤到十洲人傳有笙鶴時過北山頭

題張氏隱居

李白傳少與魯中諸王張叔明等隱於徂徠山號竹谿六逸蓋公開元二十五年遊齊趙從李白因訪張氏

之子時相見邀人晚興留濟潭鱸發發春草鹿呦呦杜酒偏勞勸張梨不外求前村山路險歸醉每無愁

避地

避地歲時晚窵身筋骨勞詩書逐墻壁奴僕且旌旄行在僅聞信此生隨所遭神堯舊天下會見出腥臊

時序類

正月三日歸溪上有作簡院內諸公

溪上浣花溪也永泰元年公辭幕府歸草堂更不復入幕矣

野外堂依竹籬邊水向城蟻浮仍臘味鷗泛已春聲  
藥許鄰人斲書從稚子擎白頭趨幕府深覺負平生  
奉酬李都督表丈早春作

蜀之都督府獨多未知李爲何人表丈謂表親之尊者

力疾坐清曉來詩悲早春轉添愁伴客更覺老隨人

紅入桃花嫩青歸柳葉新望鄉應未已四海尚風塵

暮寒

霧隱平郊樹風含廣岸波沉沉春色靜慘慘暮寒多  
戍鼓猶長擊林鶯遂不歌忽思高宴會朱袖拂雲和

漫成二首

野日荒荒白春流泯泯清渚蒲隨地有村逕逐門成  
只作披衣慣常從鹿酒生眼邊無俗物多病也身輕

其二

江臯已仲春花下復清晨仰面貪看鳥回頭錯應人  
讀書難字過對酒蒲壺頻近識峨眉老知予懶是真

春遠

蕭蕭花絮晚，菲菲紅素輕。日長唯鳥雀，春遠獨柴荆。  
數有關中亂，何曾劔外清。故鄉歸不得，地入亞夫營。

春水

三月桃花浪，江流復舊痕。朝來沒沙尾，碧色動柴門。  
接縷垂芳餌，連筒灌小園。已添無數鳥，爭浴故相喧。

春望

國破山河在，城春草木深。感時花濺淚，恨別鳥驚心。  
烽火連三月，家書抵萬金。白頭搔更短，渾欲不勝簪。

春日江村五首

農務村村急，春流汭汭深。乾坤萬里眼，時序百年心。  
茅屋還堪賦，桃源自可尋。艱難昧生理，飄泊到如今。

其二

迢遞來三蜀，蹉跎又六年。客身逢故舊，發興自林泉。  
過懶從衣結，頻遊任履穿。藩籬頗無限，恣意向江天。

其三

種竹交加翠，栽桃爛熳紅。經心石鏡月，對雨雪山風。  
赤管隨王命，銀章付老翁。生知牙齒落，名玷薦賢中。

其四

扶病垂朱紱，歸休步紫苔。郊扉存晚計，幕府愧羣材。

燕外晴絲捲鷗邊水葉開鄰家送魚鼈問我數能來  
其五

群盜哀王粲中年召賈生登樓初有作前席竟爲榮  
宅入先賢傳才高處士名異時懷二子春日復含情  
早起

春來常早起幽事頗相關帖石防隕岸開林出遠山  
一丘藏曲折緩步有躋攀童僕來城市餅中得酒還

畏人

早花隨處發春鳥異方啼萬里清江上三年落日低  
畏人成小築福性合幽棲門逕從榛草無心待馬蹄

可惜

花飛有底急老去願春遲可惜歡娛地都非少壯時  
寬心應是酒遣興莫過詩此意陶潛解吾生後汝期

落日

落日在簾鉤溪邊春事幽芳菲綠岼圃樵爨倚灘舟  
啁雀爭枝墜飛蟲滿院遊濁醪誰送汝一酌散千憂

熱三首

雷霆空霹靂雲雨竟虛無炎熱水流汗低垂氣不蘇  
乞爲寒水玉願作冷秋菰何似兒童歲風涼出舞雩

其二

瘴雲終不滅，瀘水復西來。閉戶人高卧，歸林鳥却迴。  
峽中都似火，江上只空雷。忽見陰宮雪，風門颯踏開。  
其三

朱李沉不冷，雕胡炊屢新。將衰骨盡痛，被暍味空頻。  
歛翕炎蒸景，飄飄征伐人。十年不解甲，為爾一霑巾。

秋野五首

秋野日蔬蕪，寒江動碧虛。繫舟蠻井絡，卜室楚村墟。  
棗熟從人打，葵荒欲自鋤。盤飧老夫食，分減及溪魚。

其二

易識浮生理，難教一物違。水深魚極樂，林茂鳥知歸。

吾老甘貧病，榮華有是非。秋風吹几杖，不厭北山薇。

其三

禮樂攻吾短，山林引興長。掉頭紗帽側，曝背竹書光。  
風落收松子，天寒割蜜房。稀疏小紅翠，駐屐近微香。

其四

遠岬秋沙白，連山晚照紅。潛鱗輸駭浪，歸翼會高風。  
砧響家家發，樵歌箇箇同。飛霜任青女，賜被隔南宮。

其五

身許麒麟畫，年衰鴉鷺羣。大江秋易盛，空峽夜多聞。  
逕隱千重石，帆留一片雲。兒童解蠻語，不必作參軍。

悲秋

涼風動萬里，羣盜尚縱橫。家遠傳書日，秋來為客情。  
愁窺高鳥過，老逐衆人行。雖欲投三峽，何由見兩京。

薄遊

浙浙風生砌，團團月隱墻。遙空秋鴈滅，半嶺暮雲長。  
病葉多先墜，寒花只暫香。巴城添淚眼，今夕復清光。

搖落

搖落巫山暮，寒江東北流。煙塵多戰鼓，風浪少行舟。  
鵝費羲之墨，貂餘季子裘。長懷報明主，卧病復高秋。

季秋江村

喬木村墟古，疎籬野蔓懸。素琴將暇日，白首望霜天。  
登俎黃柑重，支床錦石圓。遠遊雖寂寞，難見此山川。

大曆二年九月三十日

為客無時了，悲秋向夕終。瘴餘夔子國，霜薄楚王宮。  
草敵虛嵐翠，花禁冷葉紅。年年小搖落，不與故園同。

秋清

高秋蘇肺氣，白髮自能梳。藥餌憎加減，門庭悶掃除。  
杖藜還客拜，愛竹遣兒書。十月江平穩，輕舟進所如。

十月一日

有瘴非全歇，為冬亦不難。夜郎溪日暖，白帝峽風寒。

蒸裏如千室，焦糖幸一枰。茲晨南國重，舊俗自相歡。

初冬

垂老戎衣窄，歸休寒色深。漁舟尚急水，獵火著高林。  
日有習池醉，愁來梁父吟。干戈未偃息，出處遂何心。

孟冬

大曆元年冬夔州作

殊俗還多事，方冬變所為。破柑霜落爪，嘗稻雪翻匙。  
巫峽寒都薄，烏蠻瘴遠隨。終然減灘瀨，暫喜息蛟螭。

冬深

花葉隨天意，江溪共石根。早霞隨顫影，寒水各依痕。

易下楊朱淚，難招楚客魂。風濤暮不穩，捨棹宿誰門。

歲暮

歲暮遠為客，邊隅還用兵。煙塵犯雪嶺，鼓角動江城。  
天地日流血，朝廷誰請纓。濟時敢愛死，寂寞壯心驚。

元日寄芾氏妹

至德二年陷賊中作

延聞芾氏妹，迎在漢鍾離。郎伯殊方鎮，京華舊國移。  
春城廻北斗，郢樹發南枝。不見朝正使，啼痕滿面垂。

人日

東方朔占書正月一日為雞，二日為狗，三

日為豕四日為羊五日為牛六日為馬七日為人八日為穀其日晴主所生之物育陰則災

元日到人日未有不陰時水雪鸞難至春寒花較遲雲隨白水落風振紫山悲蓬鬢稀疎少無勞比素絲

社日兩首

社地主土神也共工氏有子曰勾龍氏平水土故祀以為社又厲山氏之有天下也其子柱能植五穀故祀以為稷后稷之神亦在內古者止有春社秦德公始用伏日

為秋社磔狗四門以禦蟲災社與伏乃同日也至漢方有春秋二社與伏分也蓋伏者金氣伏藏之日也謂陰氣將起自於殘陽而未得升故名伏日蓋社用春分前後戊日戊者土也伏用小暑以後三庚日為三伏庚者金也秋金代夏火金畏於火故曰伏

九農成德業百祀發光輝報郊神如在馨香舊不違南翁巴曲醉北鴈寒聲微尚想東方朔挾諧割肉歸

其二

陳平亦分肉。太史竟論功。今日江南老。他時謂北童。  
歡娛看絕塞。涕淚落秋風。鴛鴦迴金闕。誰憐病峽中。

熟食日示宗文宗武

熟食即寒食節。言其禁烟預備熟食以過節也。

消渴游江漢。羈栖尚甲兵。幾年逢熟食。萬里逼清明。  
松栢邛山路。風花白帝城。汝曹催我老。回首淚縱橫。

又示兩兒

令節成吾老。他時見汝心。浮生看物變。為恨與年深。  
長葛書難得。江州涕不禁。團圓思弟妹。行坐白頭吟。

寒食

寒食江村路。風花高下飛。汀烟輕冉冉。竹日淨暉暉。  
田父要皆去。鄰家問不違。地偏相識盡。雞犬亦忘歸。

上巳日徐司錄林園宴集

周禮三月三日為上巳。女巫掌歲時以祓除疾病。脩禊脩者潔也。故於水上盥潔之也。

鬢毛垂領白。花蘂亞枝紅。欹倒衰年廢。招尋令節同。  
薄衣臨積水。吹面受和風。有喜畱攀桂。無勞問轉蓬。

端午日賜衣

公時居諫省故得賜衣

宮衣亦有名，端午被恩榮。細葛含風軟，香羅疊雪輕。自天題處濕，當暑著來清。意內稱長短，終身荷聖情。

九日曲江

漢武帝所鑿以流水屈曲故名

綴席茱萸好，浮舟菡萏衰。季秋時欲半，九日意兼悲。江水清源曲，荆門此路疑。晚來高興盡，搖蕩菊花期。

九日楊奉先會白水崔明府

今日潘懷縣，同時陸浚儀。坐開桑落酒，來把菊花枝。天宇清霜淨，公堂宿霧披。晚酣留客舞，鳧舄共差池。

雲安九日鄭十八携酒陪諸公宴

寒花開已盡，菊蕊獨盈枝。舊摘人頻異，輕香酒暫隨。地偏初衣袂，山擁更登危。萬國皆戎馬，酣歌淚欲垂。

九日二首

九月九日為重陽節，此日折茱萸房以插言辟除惡氣而禦初寒。

舊日重陽日，傳杯不放杯。即今蓬鬢改，但愧菊花開。北關心長戀，西江首獨迴。茱萸賜朝士，難得一枝來。

其二

舊與蘇司業，兼隨鄭廣文。采花香泛泛，坐客醉紛紛。

野樹歌還倚，秋砧醒却聞。歡娛兩冥冥，西北有孤雲。  
九月八日諸人集于林

九日明朝是，相要舊俗非。老翁難早出，賢客幸知歸。  
舊采黃花贖新梳，白髮微謾看年少。樂恐淚已霑衣。

九日登梓州城

伊昔黃花酒，如今白髮翁。追歡筋力異，望遠歲時同。  
弟妹悲歌裏，朝廷醉眼中。兵戈與關塞，此日意無窮。

九日奉寄嚴大夫

公九日在梓州登臨，侍嚴武還朝尚在蜀棧道中

九日應愁思，經時冒險艱。不眠持漢節，何路出巴山。  
小驛香醪嫩，重巖細菊斑。遙知簇鞍馬，回首白雲間。

杜位宅守歲

時公在長安年四十歲在從弟杜位宅守歲位為考功郎中朔州刺史後貶新州

守歲阿咸家，椒盤已頌花。盞簪喧榼馬，列炬散林鴉。  
四十明朝過，飛騰暮景斜。誰能更拘束，爛醉是生涯。

朝二首

清旭楚宮南，霜空萬嶺含。野人時獨往，雲木曉相參。  
俊鶻無聲過，饑鳥下食貪。病身終不動，搖落任江潭。

其二

浦帆晨初發，郊扉冷半開。村疎黃葉墜，野靜白鷗來。  
礎潤休全濕，雲晴欲半迴。巫山冬可恠，昨夜有奔雷。

晚

杖藜尋晚巷，炙背近墻暄。人見幽居僻，吾知拙養尊。  
朝廷問府主，耕稼學山村。歸翼飛棲定，寒燈亦閉門。

反照

反照開巫峽，寒空半有無。已低魚復暗，不盡白鹽孤。  
荻岸如秋水，松門似畫圖。牛羊識童僕，既夕應傳呼。

暝

日下四山陰，山庭嵐氣侵。牛羊歸徑險，鳥雀聚枝深。  
正枕當星劍，收書動玉琴。半扉開燭影，欲掩見清砧。

向夕

畝畝孤城外，江村亂水中。深山催短景，喬木易高風。  
鶴下雲汀近，雞栖草屋同。琴書散明燭，長夜始堪終。

薄暮

江水最深地，山雲薄暮時。寒花隱亂草，宿鳥擇深枝。  
舊國見何日，高秋心苦悲。人生不再好，鬢髮白成絲。

日暮

日落風亦起，城頭烏尾訛。黃雲高未動，白水已揚波。

水詩分數 卷之四 百六  
羗婦語還哭，胡兒行且歌。將軍別上馬，夜出擁彫戈。  
日暮

牛羊下來夕，各已閉柴門。風月自清夜，江山非故園。  
石泉流暗壁，草露滴秋根。頭白燈明裏，何須花燼繁。

夜二首

白夜月休弦，燈花半委眠。號山無定鹿，落樹有驚蟬。  
暫憶江東鱸，兼懷雪下船。蠻歌犯星起，重覺在天邊。

其二

城郭悲笳暮，村墟過翼稀。甲兵年數久，賦歛夜深歸。  
暗樹依巖落，明河繞塞微。斗斜人更望，月細鵲休飛。

夜

絕岸風威動，寒房燭影微。嶺猿霜外宿，江鳥夜深飛。  
獨坐觀雄劍，哀歌嘆短衣。煙塵繞閭闔，白首壯心違。

中夜

中夜江山靜，危樓望北辰。長爲萬里客，有愧百年身。  
故國風雲氣，高堂戰伐塵。胡雛負恩澤，嗟爾太平人。

中宵

西閣百尋餘，中宵步綺疏。飛星過水白，落月動沙虛。  
擇木知幽鳥，潛波想巨魚。親朋滿天地，兵甲少來書。

不寐

瞿塘夜水黑城內改更籌翳翳月沉霧輝輝星近樓  
氣衰耳少寐心弱恨容愁多壘滿山谷桃源無處求

倦夜

竹涼侵卧內野月滿庭隅重露成涓滴稀星乍有無  
暗非螢自照水宿鳥相呼萬事干戈裏空悲清夜徂

將曉二首

石城除擊柝鐵鎖欲開關鼓角悲荒塞星河落曉山  
巴人常小梗蜀使動無還垂老孤帆色飄飄犯百蠻

其二

軍吏回官燭舟人自楚歌寒沙蒙薄霧落月去清波

壯惜身名晚衰慙應接多歸朝日替笏筋力定如何

曉望

白帝更聲盡陽臺晚色分高峰寒上日豐嶺宿霾雲  
地坼江帆隱天清木葉聞荆扉對麋鹿應共爾為群

歸夢

道路時通塞江山日寂寥偷生惟一老伐叛已三朝  
雨急青楓暮雲深黑水遙夢歸歸未得不用楚詞招

杜詩分類卷之四終





